

西園聞見錄

西園聞見錄卷之五十六目錄 外編

兵部五

防倭

前言

胡松

蕭彥

佚名 二則

王鳴鶴 二則

楊守陳

鄭若曾

佚名

鄧城

佚名

佚名

佚名

薛俊 二則

佚名 二則

李承勛

胡宗憲

往行

陳思盼

附夷地志略

附日本國 三則

卜大同

嘉定倭寇

任環 七則

王直

張經

胡宗憲

郭成

張汝濟

佚名

西園聞見錄卷之五十六

八

嶺南 張 萱子孟奇甫 輯

兵部五

防倭

前言

胡松曰今年海內憂世之士游談聚議必曰南倭北虜然言倭事者略矣何者我國家之有天下實逐狄君而宅之狄君遁遁而遺孽支屬尚多有之是雖大將屢出成祖三犁然地廣種煩滋植甚易故永樂以來馬哈木阿魯台本雅失里之徒跳梁躡躅至爵之三王而後少戢以定矧又割大寧而棄之其後寢然寢熾卽紅羅白雲開平木葉東勝拂雲之險皆不能守正統末幾至覆沒弘治中繼以火篩浸淫削折并朔方河南故地遂失矣自是國門戎索之憂肘腋腹心之患日切孔邇憂及廊廟卽廊廟不遑暇食文經武略歲積月增乃諸邊鎮既有撫臣又

設總督而總督之設初亦止于延寧甘固四鎮而止其後宣大遼薊則皆並設至于兵備憲使參遊副將之屬不可勝紀法蓋日詳密矣倭之負海卽自玄菟樂浪迄于徐聞東莞要無慮萬餘里所在可犯然自聖祖拒絕信國經略之後伏不敢動者頗歷年所永樂中雖嘗蠢動賴劉江望海窩之捷寧謐蓋百餘歲比歲海防闕疎舶利羨溢濱海三窟之豪造舟貨直淵數卵翼橫行洋中翩翩如鴈春來秋去各有主名當事者卽知其然而憂連懼及托于暗且曠矣故人老而耄以荒器陳而敵以圯法久而蠱且蠹蓋其理也重以風俗崩頽紀綱爛潰君子小人交驚于利以陰召陰小雅廢而裔夷乘矣前此十數禩廟堂蓋憂患之嘗遣重臣巡視竟以羅禍自是益弊所忌因緣忿怒轉爲叛逆乘勝從衡狡焉思啓蓋自壬子至戊午黃巖至淮泗沙壩場渚至村落邑鎮而兩浙三吳長淮之禍變慘矣所賴聖主憂民天心悔禍英豪膠力兇渠授首雖其遺燼餘烈時或灼然而巨燄大勢遠其過矣顧當時變出倉卒事承蠱壞徵兵調賦署吏逮官一切從便頗覺煩費多事焉

蕭彥曰今天子聖神御極薄海內外罔不賓服而獨北之虜南之倭世爲我患我所爲列戍而守借箸而籌非倭則虜耳而倭與虜兩者其患同其情異虜利在騎倭利在步虜利在弓矢倭利在刀劍虜利在大衆長驅直搗如虎狼咆哮卒莫可撓倭利在零散橫跳側出如蜂蛇螫人莫知所自虜利在秋冬秋冬則馬肥便于掠倭利在春夏春夏則風迅便于航虜去來有時卽大掠率旬計而返倭出沒不測一突入輒寢處爲常虜利在平原平原易驅倭利在川巖川巖易伏虜利在毛飲不藉屋居田作倭利在火食不離米鹽酒肉而虜之患常在西北倭之患常在東南西北習虜故利于禦虜東南習倭故利于禦倭蓋虜與倭異情而我所以禦之亦異宜其大較若此矣虜姑無論倭自嘉隆以來海波不揚者垂三十年東南且忘倭何言西北歲辛卯有閩人自海外來備言倭關白匪茹狀守臣以聞天子下羣臣議防倭計無何倭果入朝鮮迫遼左如閩人言余竊有感于往事焉嘉靖中東南數中倭我好民王直徐海輩竊據海上日糾倭入寇無已時至動天下之兵以勦之不支

而胡尚書宗憲實任之宗憲曰二酋不擒禍未弭也多方用間誘二酋而弄之股掌之中卒之倭殲而二酋戮患遂息尚書性豪邁不受束縛墨輕千金如塵其軍興不能無濫費費且不可詰而東南十年之患一旦底定則尚書力也倘可比李之市租陳之反間金乎尚書旣以論罷罷而構尚書者旋誣以蜚語詔逮問賴肅皇帝聖明寬其身又賴今上聖明寬其家而尚書竟客死于邸其家亦幾于壁立余仕武林則武林人莫爲尚書嗟者豈惟尚書鄞有蔣陳兩生者應尚書募航海諭日本陰誘直而卒以直至夫兩生者其人不可知其干文網不可知要以狎風濤出十死一生以爲所欲爲斯亦難矣直戮而兩生坐危法幾論死故夫國家之難也常難于任人而人臣之難也常難于令終則豈非當事者不暇顧其後而議事者不復念其前兩相戾而無當哉

□□日今之談禦寇者必曰水戰水戰必曰禦外洋使遠海果堪大出舟師逐盜于郊原以毋貽門庭憂詎非計哉然而風潮有順逆旋泊有便否蛟龍之驚觸礁之險設伏擊刺之難昔議多以爲未便乃鄭若

曾則云哨賊于遠洋而不常厥居擊賊于近洋而勿使近岸似矣然而夾擊設奇之變亦有所未盡也卽以浙論如陳錢極遠孤山無壘且水深不可下旋馬蹟有龍窟難舉戰砲大衝雖東面有壘而水極震蕩易壞舟說者以爲非戰地也姑置勿論矣若普陀金塘去舟山非遠殿前洋山去崇明非遠昔工書馬坤議欲大集戰艦哨洋山哨普陀以遏賊鋒其策固未可盡廢也何也普陀乃賊禮佛換水之所必登洋山乃賊由浙入直之所必犯我誠于浙東以舟山爲重鎮集水陸諸軍爲正兵飭戰具于沈家門岑港等處而奇兵則遠出普陀伏兵則潛布洛伽山等壘互爲聲援往者參將盧鏜不于普陀謀搗巢乎先一日遣謀驗之傍無一舟兵旣合賊乃更出他島之精銳夾攻我我遂大衄夫惟鑒賊之所以誘我者反以誘賊而賊反有不可制者乎唐臣陸贄曰中國與夷狄各有所長不可勉于所短而敵其長宜用所長以乘其短倭之長技在步中國之長技在船海上之船不論人力而論船力不論船力而論風力何也倭之造船與中國異必用大木取方相中合縫不使鐵釘

惟聯鐵片不使麻筋桐油惟以草塞罅漏而已名短水草費功甚多費材甚廣非大力量未易造也大者容三百人小者僅容四五十人其形卑隘難于仰攻若遇無風逆風者倒桅盪槽不能轉舵最畏我廣船福船之衝犂先年浙直用兵調取多藉其力及今非多造廣福船分給各鎮不足以資出洋犂賊之用又非造極堅工卽令造船之人長爲駕駛恐多破冒無資實用悉心整理協謀共濟是則各鎮撫道諸臣之任矣又如治州之蒼山船便于追賊崇明之沙船便于淺水鼓風噴船便于哨探二刻船便于衝濤混戰朝鮮龜船布帆監眠惟意風逆潮落亦可行兼而備之夫非今日水戰之急圖者乎說者謂舟師非慣習風濤者一望海洋鮮不驚嘔吐不支何以制勝竊見沿海鹽徒儘可選用其次水兵奇妙如浙之七里灘併金山寺下漁人俱能朝入水暮方出白晝水底鎖船致敵舟之沉溺黑夜抽幫起旋致賊師之失隊其次則南直以販賣私鹽者人船輕便且習風濤黑夜潛行駕棹如飛用以出奇偷營偵探是又一策也倭之火器祇有鳥銃直百步而止中國有鳥銃



又有大砲去七百步佛郎機去三百步又有神鎗火箭飛天噴筒埋火藥筒大蜂窩火妖諸器敵不足以當我明甚第聞倭制火銃其藥極細以火酒漬製之故其發速又人善使故發必中中國有長技而製之不精與無技同謂宜嚴督製造令中法更熟演之何憂乎不敵耶倭銃發每無聲人不及防類能洞甲貫堅諸物難禦惟是廣中所產鏢膠形如掌片堅勁異常較之浙中所產者不同用釘連綴于木架造爲防牌鉛彈始不能透亦一策也倭奴裸體以戰鮮有甲冑蔽體惟廣東所造藥弩見血立斃較之弓弩尤利扼險守隘破敵摧堅無有妙于此者南見長寧等處諸巢遺孽人多驍捷技藝熟閑輕儇佻躍百倍倭奴慣用此弩又有鈎旗杆長丈許用布五六幅縫綴爲旗周匝綴利鈎每遇對敵橫舉陣前衆兵排列于後五步之內旗開而兵器隨之以出飛舞招颺矢石不能入又足以牽挽敵人衣裙使不得運用大率一旗可蔽數十人百戶吳夢豹自謂曾統兵贛營力足招致數千人破敵特以疏請是亦一策也

又曰曩者平秀吉之橫行海上也挾詐力以恐喝諸島而習爲操莽之圖乃山城君文祿固在其臣未必盡心服也聞薩摩島主義九故與抗衡誘翫其弟而幽其子秀吉之爲亦慘矣豈其遽忘會稽之耻而况清正行長在鮮雅不相能可貳也今其言曰家康公發百萬兵悉誅羣奸臣等立秀賴公而爲君則諸賊之內自操戈已甚夫安知不各懷併吞志耶聞其國有大唐街所居皆華人而郭國安許儀后以醫幸于敵常以敵情輸我每有不忘故國之人心又玄蘇者乃杭州中峯和尚十八代孫亦有回漢朝祖之願將官茅國瓚兄弟新從倭土來兼以邇者倭所送回閩中通人試一參迅敵情應不啻燭照吾因之而間之或以伐其謀或以攜其黨卽不然我亦可以察其情形而毋爲所乘胡宗憲之擒徐海王直也往往出此秘計願自蔣洲陳可願之徒多獲罪灰壯士心卽今捐金不問安所得陳平而用之夫莫厚于間賞莫親于間使則畜之何可不早畜也

王鳴鶴曰倭夷之來雖無定向而天風考驗實有定期夫北風而南南

風而北未有北風而能北南風而能南者觀其風之所自而預守其險則無不中矣其計亦不過總設聽調重兵一二枝防守于適中之陸地全在將臣得人又勤考天時如遇天風大作之時亦照方位前去與水兵相爲表裏而預待之譬之陣法然四頭八尾觸處爲首不觸則不應守險亦然搶其上風陷之死地乃勝算也顧此中有大機則尤係之乎哨望何也倭奴遠涉而來或以休憩聯踪或以潛伺虛實未有不泊外島而徑入內地者飛報聲息全在哨卒雖其善爲伏匿而暗夜亦必以微露火光望海窩之寇向非瞭卒先爲傳報廣寧卽號智勇亦奚由設備以圖厥功乎故今海上哨船在各省諸守把等官分有信地不待言矣而出外洋探哨者必須嚴爲期會如往者溫御史如璋條議直隸備倭方略謂兵船在狼山福山者遠哨于崇明而專守三沙一帶在松江嘉興者遠探于外洋而會守獨山一帶江北兵船不至三沙浙直兵船不會獨山皆以守備不設論罪他處固可做而行也至若水艦望斗之瞭卒當有警時須如督撫唐順之議擇健壯善瞭者每夜給銀一兩以

酬其勞有悞軍機必辟勿宥而在陸地之守望則有總兵戚繼光閩中墩墩舉旗舉火之法在行之有紀核之盡法庶賊不得多方以誤我我乃可併力以當賊故曰哨探三軍之耳目也耳目不真有不至冥行蹶事者乎此之謂哨望之宜嚴也往嘉靖季年之倭我內地奸人引而至也其遼陽山東不被禍者無通夷接濟之人也今中土之僑寓倭境者固不乏人在浙直雖有互市之禁而若南澳月港諸處番舶固數數往來也紅夷黑夷頤構繫于南海若閩亦非無事之地也而倭且猥以渡勘合船通商爲請又復陰陽其說以要我其生心如此懼有不逞若徐王輩以涓涓之不塞而流爲滔天且奈何哉故今欲固封守莫如禁通夷欲禁通夷莫如核市舶何也番夷載貨前來志在賈利容未敢軼越於約束獨是我人載私貨出大洋以就市于倭者或造重底船相貼換或販米穀相接濟藉寇兵齎盜糧爲害滋大今或虞其激而生他變不能盡絕番商之來則何可不禁我徒私販之往也須嚴爲令凡近海處所止許造單桅小船以便近嶼漁採其或違禁私造雙桅大船者行令

搜捕燬其舟罪其人仍于各鄉編立船甲長副不拘人數惟視船之多寡依十家牌法循序應當如船二十隻總統于船甲長內以十隻分統于甲副仍于船尾外大書某縣某船甲下某人十字翻刻墨填爲記其甲長副各置簿一扇備載鄉中船數并某樣船隻某項生理一一直書歲爲具呈於縣互相糾察犯則連坐夫旣禁巨艦又有統紀通夷之輩自應斂戢卽有一二番買仰鼻息以就市於我其爲防禦易爲力矣

又曰先是策倭者有云守必以城而守城必以野自法有陷城之誅而未嚴殘野之罰賊至則苟負孤城而棄其四境烟焰相望號聲相聞所至蕭條有不忍見聞者安望其援乎故李牧備邊先在收保而不失不能收保是資敵也後將軍於燉煌先在乘隧列障枝聯不絕賊不敢犯使疎而可犯是自敵也宜略做墩堡之製使民各自爲市市列爲堡約其道里之中使勢可相及每賊至則墩堡固守而郡縣急趨而助之又時嚴其法使四境殘甚者與失城同罪則人各爲戰地各爲守賊入而無所得其勢自困矣

楊公守陳曰倭奴僻在海島其俗狙詐而狼貪自唐以至近代已嘗爲中國之疥癬矣國初洪武間嘗來貢而不恪朝廷既正其罪後絕不與通著之爲訓至永樂初始復貢而後繼之於是往來數數知我國中虛實山川險易因肆奸譎時擊舟載其方物戎器出沒海道而窺伺我得間則張其戎器而肆侵夷不得間則陳其方物而稱朝貢侵夷則捲民財朝貢則沾國賜間有得不得而利無不得其計之狡如是至宣德末來不得間乃復稱貢而朝廷不知其狡詔至京師燕賞豐渥細載而歸則已中其計矣正統中來而得間乃入我桃渚犯我大嵩劫倉庾焚室廬賊殺蒸庶積骸流血如陵谷縛嬰兒于柱沃之沸湯視其啼號以爲笑樂捕得孕婦不知女男剔視之以賭酒荒淫穢惡至有不可言者舉民之少壯與其粟帛席捲而歸巢穴城野蕭條過者流涕於是朝廷下備倭之命令重帥恆守要地增城堡謹斥堠大修戰艦合浙東之軍分番防備而兵威振于海表七八年間邊民安堵而倭奴潛伏罔敢喘焉茲者天誘其衷復來窺伺而我軍懷宿昔之憤幸其自來送死皆曠目

彌刃欲食其肉而寢處其皮彼不得間乃復稱貢而我師遂其請以達于朝是將復中其計矣今朝廷未納其貢而吾郵先罹其害及民糴稼爲之舍館腴民脂膏爲之飲食勞民筋力爲之役使防衛晝號而夕呼十徵而九斂雖雞狗不得寧焉而彼縱肆無道強市物貨善謔婦女貂璫不之制藩憲不之問郡縣莫敢誰何民物既譁然不寧矣若復詔至京師則所歷之地民其有不譁然如吾郵者乎矧山東郡縣當河決歲凶之餘其民已不堪命尤不可使之譁然也且其所貢刀扇之屬非時所急價不滿千而所爲糜國用斂民生以通貢厚之者一則欲其向化之心一則欲弭其侵邊之患也今其狡計如前所陳則非向化者矣受其貢亦侵不受其貢亦侵無可疑者矣昔西旅貢獒召公猶致戒于其君越裳獻白雉周公猶避讓不敢受漢通康居屬賓隋通高昌伊吾皆不免乎君子之議况今倭奴最我仇敵而干構釁之餘復敢懷其狙詐狼貪之心而施其奸計以罔我其罪不勝誅矣况我與之通乎然彼以貢獻爲名旣入我境而遂誅賊則類于殺降不武不義若從納其所貢

則中其奸計而益招其玩侮不可謂智取一而損十得虛而費實不可謂計數所持以事無用俾其不兵甲而騷不水旱而窘不可謂仁有一於斯皆非王者之道竊以爲宜降明詔數其不恭之罪示以不殺之仁歸其貢獻而驅之出境申命海道帥臣益嚴守備則草薙而禽獮之俾無噍類若是則奸謀狡詐破沮不行若日之所照月之所臨物不能遁故天下咸知朝廷之明貢獻不納貨賄不貪雖有遠方珍怪之物無所用之故天下咸知朝廷之廉自江浙以達京畿巨數千里之民舉不識輸運之勞不知徵斂之苦父哺其子夫煦其妻而優游以衣食故天下咸知朝廷之仁裔夷知吾國有禮義而不敢侮奸宄知吾國有謀猷而不敢發桴鼓不鳴金革不試故天下咸知朝廷之威一舉而衆善備焉斯與勞民費國而幸蠻夷者萬不侔矣

鄭若曾曰倭寇之患自福建始乃內地奸民勾引之也其時爲嘉靖二十五年禍尙隱而未彰微而未大都御史朱統用海道副使柯喬議欲以海滄月港等澳耆民充捕盜撲之備倭都指揮黎秀獨謂不然上議



于巡按御史金豪曰日本倭夷先年內犯朝廷屢下備倭之詔及委重臣以督海防是以海洋乂安今承平日久軍民趨利忘害而各處輕生之徒攘臂向前私通貿易向嘗緝絕今復啓釁若不預行究治恐禍患日深卒難禁制也既而復上議曰近署安邊館事稔知違禁通番大船之詳其船皆造于外島而泊于外澳或開架以通番或轉售于賊黨而嵩嶼漸尾長澳海滄石馬許林白石等澳乃海賊之淵藪也本職欲行禁治恐澳中勢要抗拒不服反速其禍乞行府縣巡捕官親詣各澳密行擒治船隻應燒燬者燒燬應留用者留用庶頑民知警而通番之風少息矣議上秀遂舉行令漳泉者民捕盜怨謗致劾免官後十餘年倭患大熾沿海數千里生靈靡不荼毒人始服黎遠見而惜其冤抑向使早用其言胡以有是今論者但知紀錄戰功而曲突徙薪謾不之及不能無感故志之

□□□曰兩浙形勝大半負海島夷之來最爲切近日本舊時貢道在焉論列郡之海口則温州之飛雲橫陽館頭台州之松門海門寧波之

定海大浹湖頭渡紹興之三江沙門杭州之赭山龕山嘉興之乍浦澉浦皆倭寇窺犯之地列郡之門戶也守門戶則堂奧自安矣論海洋之要害則金盤之鳳凰山南麂山松海之大陳大佛頭昌國之韭山定海之舟山遠而陳錢馬蹟下八山臨觀之列港海寧之洋山許山皆倭寇必經之地沿海之藩籬也守藩籬則門戶自固矣夫浙東地形突出海外固爲當敵要衝浙西雖涉裏海而豪華財帛之所聚也尤爲賊所垂涎兩浙設禦其容以軒輊耶

鄧城曰倭自彼島入寇必乘風汎之便如遇正東風必由下八山陳錢馬蹟等澳以犯浙江遇東南風必由茶山入大江犯直隸所以然者以海中山沙自馬蹟而北至于崇明或斷或續互相連絡船不能東西飛渡故國初於海島便近去處俱設衛所堡寨以控禦之至爲精密承平日久募衛徒置倭患寢興今督撫修復舊制凡海中諸山沿海險隘建官屯守分船巡哨自舟山以北如大衛馬蹟洋山爲倭所必經之地而陳錢尤爲分鯨要衝設正副二總兵分駐金山臨山互守陳錢參將分

屯馬蹟等山以防倭寇之從下入山來者又于狼山蓼角嘴設遊兵把總以防倭寇之從茶山來者又于昌國以北崇明以南沙島迂迴半山峙仍設參遊二員一駐定海一駐竹箔嚴督各總南北會哨以防倭寇之四散逸入者伺察既嚴警報尤捷居常各督所轄有急互相策應賊又安能越過各島流毒內地哉當職者誠能守如赴戰哨如賊臨運臂使指潛機伏形或迎其來或邀其歸萬無不中矣

□□□曰自帝王代興以來率多卜都關陝宅中雒汴左隴右冀襟洛帶河其去海微遠獨重西北邊謹備胡而防海較猶稍緩卽或鯨波弗靖齟齬耳撲滅之亦易爲力也惟我太祖高皇帝龍飛淮南奠鼎金陵至永樂間乃遷北平北平枕居庸咫尺滄渤遼陽東控鴨綠爲左臂山東橫巨海上爲門戶沿海而南則江淮南北根本重地又其南則兩浙閩粵財賦要區皆近與倭鄰近僅隔一水風帆時至爲變叵測又朝鮮接壤遼左勢壯外藩頃自平酋越志橫肆蹂躪幸而天禡厥魄國且內變撤兵東歸獲延李氏如綫之祚匪我兵力果能制其死命也乃今

偃甲未幾而沿海諸烽火又以變告矣夫倭自辛卯狡焉興戎蠶食屬國而我且仗義聲討徂過狂鋒然而始議援已乃議封已又大發兵議數再尋干戈而所損中國士馬以數萬計所費中國帑藏以數百萬計彼卽不能終有樂浪玄菟之墟亦旣捆載以饜所欲而玩中國于股掌矣今之駭視倭者又曰日本爲國甲于東夷依山負海雄據五畿七道三島兼有附庸之郡百餘守不設險自衛以兵民俗輕生習于戰鬪則中國之卒弗敵也長刀橫舞一躍十步鳥銃精熟百發百中弓長矢巨近人方發鈹鎗不露竿突忽而擲則中國之技弗敵也足智多謀設奇盡變衝陣必因人先動動而後突入每乘勝長驅戰酣必四面伏起突遶陣後令我軍驚潰或以斂跡爲進取或以張揚爲逃遁則中國之將弗敵也乘汎走舸疾于風雨搗虛擊懈幻若鬼域沿海萬五千里間若外島若內港彼無所不攻而我無所不備則中國之舟師弗敵也是則然矣而不盡然夫倭雖強計其三十六島之衆戶不過一十七萬餘課不過八十八萬三千三百有奇曾不足當中國數大郡彼卽簡銳而來

聞止薩摩州之徒曠悍健鬪他且勇怯相半亦僅僅數萬衆而止耳于以當中國全盛之兵力此其不足畏者一我之救鮮也萬里奔波倭爲主而我爲客若其入寇則衝波歷險棲泊外蕃如許時乃始窺犯內境海若之所驚漂風霧之所摧撼卒未得蘇而我且以逸待勞坐乘其憊此其不足畏者二倭慣用伏長于陸戰若當海洋則其舟甚小可犁而沉且隨濤震蕩難使火器而我以福船鷹船衝其鋒海滄鱗鱗其力擊以發煩扼以陸兵曾未登岸而氣已先靡矣此其不足畏者三倭自海外裹糧而來多則足支兩月而止計惟因糧于我乃克宿飽我誠堅壁固守在在隄禦令進無所掠退不獲歸夫先自餒急擊勿失固可困而縛也此其不足畏者四明興初亦未嘗有海備至洪武二年倭寇山東寇崇明又寇惠潮乃命行人楊載齋璽書諭其國王良懷良懷乃遣僧祖來貢方物三年寇山東轉寇浙福旁海諸郡五年寇海鹽澈浦温州我始令浙福造海船防倭六年遂以于顯爲總兵官出海巡逐未幾復寇我登萊七年寇我膠州靖海侯吳禎追擊之于琉球大洋斬俘甚

衆十二十三年來貢俱以無表文分置其使于川陝三邊番寺十四十五年皆來貢後乃以倭使如瑤坐通胡惟庸事敗發雲南守禦始令信國公湯和築登萊至浙東西防倭衛所是冬又令江夏侯周德興築福建海上十六城二十六年倭又寇我金鄉二十七年我乃敕魏國公徐輝祖安陸侯吳傑練兵海上一意防倭絕其貢不與通載在祖訓有云四方諸夷皆限山隔海僻在一隅得其地不足以供給得其民不足以使令若其自不揣量來擾我邊則彼爲不祥彼既不爲中國患而我與兵輕伐亦爲不祥也

□□□日嘉靖之季倭爲祟且垂二十年始以我豪貴負番賈直挑之冀會官邪政亂民迫貪酷挺而走險爲倭導餌而亂遂滋熾上屢震怒逮浙江撫臣朱統己又逮應天撫臣彭黯屠大山統故方勳任勞怨嘗言去外夷盜易去中國盜難竟以誣詆憤悶死乃遣工部侍郎趙文華出禱海神且視師時則提督兵部尙書張經在江南有功爲所構陷都御史李天寵以胡宗憲排奪其位皆得罪死西市人且重足憂不在倭

而在纓蓋至文華再出督括官庫仇斂富民調狼達兵極四遠公私枵然煩敵而中國盜大起其後朝政改紀東南困海患久咸憤習兵諸大帥俞大猷戚繼光劉顯之倫競忠力自奮而始靖當事棘時天下非乏兵若餉也又非盡無熊虎堪任將帥之材也然而迄多歲膚功未奏此無異故寵賂章而蒙蔽遊多任用非而賞罰失實甚且監軍督察日遺月煩計惟分誘避謹孰肯盈庭執咎其幸而定惟是檄靈于廟社而主德嚴明三尺無假故終有濟耳

□□□曰去歲日本國王差使來朝人伴動計千數來到浙江肆爲狂悖恐中間有夾帶先年攻劫爵溪等處倭賊且在寧波住久竊窺邊海港以得知水道今雖回還夷心莫測明年風汛時月恐倭賊或至犯邊緣彼先沿海各衛所原設戰船各有水寨併官軍常川在船哨備私擅回營者少正統二年革散水寨將船掣回各衛所港議守備官軍回城近便故多棄船戀家船隻不修器械不整聞知巡海三司官來點聞隨卽赴船聽點其遠去者僱人應名點視巡海官去仍復前弊是以船隻

內有朽爛遭風等項數多今浙江水旱民飢難便補造其水寨猝難復設若不設法預爲整備船隻揀選官軍修造兵器訓練武藝遇警不無失措臣同欽差鎮守浙江都知監右監丞阮隨計議得邊防急務案行浙江都布按三司各行巡海官整備外及照按察司巡海官僉事黃譽巡海一年將滿該替本官公勤廉謹提督有方軍民悅服如蒙准題乞勅該部量與增秩與同參政曹凱職專巡海備倭庶邊備得人軍備整肅緣係處置備倭事宜開載謹題請旨體訪備倭指揮千百戶中有志勇過人善撫士卒者每處四五人各營原船臨期調換今選當先船上領軍勦賊

薛公俊曰日本國者古倭奴國也天御中主都筑紫日向宮主邪摩維國尹都投馬種類百有餘國奄爲所屬號大倭王傳二十三世彥瀲尊第四子神武天皇自筑紫入都大和州疆原宮仍以倭爲號迄漢桓靈間倭奴作亂互相攻伐歷年無主有一女子名卑彌呼者年長不嫁以妖惑衆乃共立爲王法甚嚴峻在位數年死宗男嗣國人不服更相誅



殺復立卑彌呼宗女一與國遂定時稱女王國逮唐咸亨初賀平高麗  
招習夏音惡其名不善乃更號日本蓋取近日始升之義也先秦時遣  
方士徐福將童男女數千入大海求蓬萊仙不得懼誅止夷澶二州號  
秦王國屬倭奴故中國總呼之曰徐倭非日本正號也又其性多狙詐  
狼貪往往窺伺得間則肆爲寇掠故邊海復以倭寇目之苦其來而防  
之密也

又曰狼子野心剽掠其本性也魏隋唐宋以來雖屢朝貢厚叨賞賚又  
屢寇邊陸然不過肆其鼠竊毆逐之而已迄元至大二年寇慶元路燬  
郡儀及天寧寺國朝洪武五年五月五日船二百隻寇温州府永嘉樂  
清等縣十六年六月二十八日船一十八隻寇金鄉衛官軍二十八人  
被殺二十七年二月六日船九隻寇小尖亭金鄉衛官軍敵退獲人船  
一三十四年九月二十四日船六隻寇浦岐所永樂二年四月十八日  
船一十八隻寇定海衛穿山所百戶馬飛興被殺十年正月初一日船  
一十一隻寇楚門盤石衛出海官軍獲船一併首級解官十五年正月

初一日船二隻寇沙園所温州守備千戶沈鍾被殺正月十五日船八十四隻寇海門衛又寇金鄉衛壯士所及平陽岐山地方正統四年五月初八日寇定海衛大嵩所殺死官軍五月二十日寇爵溪所敵退八年六月初四日夜迷失二倭使頭普福在樂清沙嵩藤嶺獲解嘉靖二年五月初一日謙道宗設等仇殺瑞佐夷件劫東庫燬嘉賓堂初六日逃至西鶴山洋敵殺總督劉錦初七日綁去寧波衛指揮袁璉定海衛出海百戶劉恩死初九日殘夷七十步從育王嶺逃至小山浦敵殺穿山百戶胡源大抵夷情反覆不常來王于虞而猶不免蠻夷之猾夏通道于周而猶不免准夷之並與倭夷種也是以或服或叛詭譎莫測顧吾制禦之何如耳故兵法毋恃其不來恃吾有以待之毋恃其不攻恃吾有所不可攻然則受備邊之計而爲民之司命者豈可忽而不加之意哉

一〇〇〇曰倭陸不能與北兵角者騎不若也水不能與南兵角者舟不若也故南當扼之于海北當殄之于陸扼之海則沿海島嶼宜廣設衛

所而今反禁人耕種說者徒藉口國初厲禁不知國初愚民內向之意未堅往往結倭以掠中國故湯和徒之今二百餘年漸沐厚德驅之猶不肯向倭可同論乎蓋北方利用陸宜廣開水田變斥鹵爲良畝而築堡戍守倭至卽以材官羽林蹂踐之蔑不勝矣

又曰按國初東海洵邪韓等國兼兩廣漳州等郡不逞之徒逃海爲生者萬計太祖命南雄侯招海上蛋戶島人等爲水軍勿使爲東南沿邊患也自後正統年間海寇陳寬聚衆爲亂勅提督海東道王勝招撫爲軍自今倭患雖息而海洋不逞之徒猶時哨聚當嚴捕窩主以絕其交通而捕之太急又恐其生走胡走粵之念宜復高皇招徠水軍舊例隨身貨物容其到衛但收其船爲哨船用其徒爲哨軍舉行出海操練舊規軍伍充實地方獲寧涓涓之雷可以穿石當事者甚無忽之

李承勛曰宋素卿本寧波人背棄中國潛從外夷正本朝叛賊法所必誅正德年間勾引外夷俱來入貢事已敗露將置重典乃以金寶厚賂逆瑾夤緣特旨幸免天刑今次復因此人激成宗設之變訪開宗設倭

船先到而盤貨在後素卿倭船後到而盤貨獲先宗設內已不平及舶市太監置酒命座又以宗設席次抑置素卿之下其心愈加懷憤構此禍端實爲戎首稽考載籍日本在東海之中古稱倭奴漢魏以來已通中國其地度與會稽臨海相望在勝國時許其互市乃至四明沿海而來餼糧數十戈矛森具出其重貨與中國人貿易卽不滿所欲則燔燹城郭抄掠居民往往爲海邊州郡之害我祖宗灼見其情力痛絕之當開國之初八荒向風四夷賓服雖西北勁虜亦皆款塞惟是倭奴時或犯我海道是以山東淮浙閩廣沿海去處多設衛所以爲備禦後復委都指揮一員統其屬衛摘撥官軍以備倭爲名操習戰船時出海道嚴加防備近年又增設海道兵備副使一員專管可謂防範周且密矣是以數十年來彼知我有備不復犯邊奈何邇來事久而弊法玩而弛前項備倭衙門官員徒擁虛名略無實效寧波倭夷常年入貢之路法制尙存猶且敗事其諸沿海去處因襲日久廢弛尤甚乃者宗設作亂大是叛逆得意揚帆再照海外諸國名載諸皇明祖訓者凡拾有五而

日本與焉其下註日本雖朝貢暗通奸臣謀爲不軌故絕之及嘗觀本朝吏部侍郎楊守陳家藏文集亦復惓惓然以倭夷變詐兇虐時以刀扇小物褻瀆天朝規牟大利不當與之通好觀于今日之事則皇祖貽謀萬代如見而儒臣論事後世足徵其應否通貢事宜關係重大尙須會議其羈留編管夷人合待彼國嗣有遣使到來然後明降詔旨切責一併另議處分及照朝鮮國送來被搶人口王漾等人名雖審有鄉貢來歷亦恐或係潛從倭夷之人合無解回本處官司審有的確方可發落寧家又查得近日福建省舶太監奏稱有海上夷人數十遭風漂船奔逃海岸乞食被獲卽已逐日關給口糧撥軍防守亦欲伺便放歸本國竊料此屬恐是宗設餘黨竄逸到彼乞勅兵部查行都察院將倭賊仲林望古多羅譯審責令供稱宗設手下據其所知夷黨姓名若干卽將福建見獲夷名比對尙有一二相同卽係宗設之黨無疑則解赴浙江以憑查勘若非是乞勅兵部亟行福建鎮巡三司及市舶衙門將前項收獲夷人亦要以宗設作亂事情會官嚴加審譯或將一二用刑拷

鞠蓋夷情誑詐叵測未可輕信務得真情從長酌處不許輕易致使別有規避其各該地方官員失于瞭報俱各作急查提問罪會議回報再照宗設犯華之罪不可使之竟脫天誅况此賊搶掠中國船隻不任風濤未能返國必且出沒海陬掩我不備况有侵狂剽掠之虜尤乞通勅沿海各處備倭衙門整朔官兵修理戰艦習風候時出海洋瞭捕務俾罪人斯得國威以伸而聖天子日月之明雷霆之令眞足以臨照八表震警萬方矣

胡公宗憲著海圖說曰始倭之通中國也實自遼東今乃從南道浮海率自温州寧波以入風東北汛自彼來此約可四五日程蓋其去遼甚遠而去閩浙甚邇若盡其國界則東西也長行可四五月南北也短行三月而皆極于海其西北至高麗也必由對馬島開洋順風僅一日二日南至琉球也必由薩摩州開洋順風七日其貢使之來必由博多開洋歷五島而入中國以造舟水手俱在博多故也貢船回則徑歸長門拙分司官在焉故也若其入寇則隨風所之東北風猛則由薩摩或五

島至大小琉球而仍視風之變遷北多則犯廣東東多則犯福建若正東風猛則必由五島歷天堂官渡水而視之變遷東北多則至鳥沙門分鯨或過韭山海關門而犯温州或由舟山之南而犯定海犯象山奉化犯昌國犯台州正東風多則至李西懸壁下陳錢分鯨或由洋山之南而犯臨觀犯錢塘或由洋山之北而犯青村南匯犯太倉或過南沙而入大江若在大洋而風欬東南也則犯淮揚登萊若在五島開洋而南風方猛則趨遼陽趨天津大抵倭舶之來恆在清明之後前乎此風候不常難準定清明後方多東北風且積久不變過五月風自南來不利于行矣重陽後風亦有東北者過十月風自西北來亦非所利故防海者以三四五月爲大汛九十月爲小汛其停橈之處焚劫之權雖曰在倭而其帆檣所向一視乎風實有天意有備者率勝前此入寇者多薩摩肥後長門三州之人其次則大隅竺前竺二後博多日向攝摩津州紀伊種島而豐前豐後和泉之人亦間有之蓋因商于薩摩而附行者蓋日本之民有貧有富有淑有慝富而淑者或附貢舶或因商舶而來

其在寇舶率皆貧而惡且山城君號令久不行于諸島而山口豐後出雲又各專一軍相吞噬今惟豐後強頗併肥前等六島而有之山口出雲俱以貪滅亡倭蓋常尊定主矣

往行

往年奸人陳思盼等大引倭衆分寇浙福破我昌國而貪心益熾東南無歲不苦兵矣則有鄧文俊林碧川沈南山者起而寇浙直蕭顯者起而寇閩廣旋于三十二三年間次第就戮而徐海則又出矣海乃通日本率和泉薩摩肥前肥後津州對馬等倭寇我乍浦柘林用陳東葉明爲羽翼亡何海破滅于沈莊而陳東則又得志矣復通日本率肥前筑前豐後和泉博多紀伊等倭攻我金山崇明青村上海亡何東破滅于乍浦城南而葉明則又得志矣復率筑前和泉薩摩紀伊博多豐後等倭掠我乍浦新塲亡何我兵生擒之明死又有洪澤珍者爲患于漳泉興福嚴山老者爲患于月港許西池者爲患于廣東皆通番巨寇也三十八年澤珍爲我參將黎鵬所破山老遁去西池尋亦溺海死是歲王



直以總督胡宗憲誘致乃得旨伏誅而海氛頓息嗣是又有蕭雪峯張  
璉合屯大浦攻和平大金謝老巢南澳入安溪掠漳泉旋亦殄滅此大  
盜十四踪之最著者至隆慶間零倭時從賊首曾一本寇碣石等衛以  
致敗將周雲翔等叛與合己乃勦定然亦不能越粵而他爲患也大抵  
倭誘而貪最善窺敵伏而伺覲乘便乃撓順逆何常惟我是視耳往以  
邊吏弗戒闖入內地偶一得利轉引遊蔓其後我兵稍集聚而殲旃同  
乎懷抱之蠶蠶也我雖被螫彼亦尋斃時獨無狡焉雄圖者爲之謀主  
故易與耳乃今則何如哉今之倭非王直徐海之倭而家康清正義弘  
之倭竊惟平秀吉以海嶼孤踪起而篡三千年一姓之國身旣鬼錄而  
藐孤晏如猶能壓羣雄而不敢動襲人國而走其主臨之以天兵而  
氣不摧吉雖亡而其諸爪牙黠酋固無恙卽如邇者清正遺金軍門一  
書悖驚轉甚彼非誠愛中國而歸我通人又非誠慕中國而誘我通好  
毋亦陽示誇喝陰窺虛實且以爲他日之兵端故耳則備之不可不早  
計也夫倭奴之入寇也其出海海路有二曰薩摩洲五島對馬島舍是

無他便矣倭自肥前西懸曰平戶平戶之西卽五島北爲多藝爲對馬島其西北至高麗也必由對馬島開洋順風僅一二日南至琉球也必由薩摩洲開洋順風七日其貢船則獨由博多開洋因舟造于博多故也處今沿海郡縣備倭大鎮有廣東福建浙江江南淮揚山東薊遼凡七各有督撫重臣總軍務又有專劾臬臣備兵事有總鎮大將軍職調度又有參遊備總等官司哨守而諸所防禦事宜亦略可得而紀焉以要害之分守者言之在廣東則有東中西三路東路扼全粵之上游則于柘林設把總哨至豬頭礁與碣石會碣石設把總哨至大星洋與南頭會而惠潮則有參將之設南澳又有漳潮副總兵之設中路防省會之大洋則于虎頭門設把總哨至三角洲與廣海會廣海設守備哨至黃慶門與北津會而廣州則又有海防參將之設西路遏番賊之突入則于陽電設參將哨至赤水洋與白鵠門會白鵠門設把總哨至海安港與潤州會而潤州則有遊擊雷廉則又有副總兵之設瓊州白沙塞則有把總崖州則又有參將之設所以防備倭寇者如此

夷地志略倭奴國在東南大海中依山島爲居西南皆阻東海東北隅隔以大山廣袤四面各數千里東北山外歷毛人國到文身國約七千餘里西循一支北望耽羅渡到樂浪及帶方等郡約一萬二千里至遼東遠由閩浙近其貢道自浙明州衛繼其艘傳驛至京師

日本國畿內所部有山城大和河內和泉攝四五州共統五十三郡故曰五畿畿外所部東海道有伊賀伊勢摩尾張三河遠江駿河伊豆甲斐相模武藏安房上總常六十四州共統一百一十六郡南海道有伊紀淡路河波讚耆伊豫土佐六州共統四十八郡西海道有筑前筑後豐前豐後肥前肥後日向大隅薩摩九州共統九十三郡北陸道有若狹越前加賀能登越中越後佐渡七州共統三十郡東山道有通江美濃飛驒信濃上野下野陸奥出羽八州共統一百二十二郡山陽道有播磨美作備前備中備後安藝周防長門八州共統六十九郡山陰道有丹波丹波彼徂馬因幡伯耆出雲石見隱伎八州共統五十二郡故曰七道其海曲之地又有一伎島對馬島多祿島各統二郡故曰三島

自漢武滅朝鮮使驛始通于漢三十餘國至光武中元二年使人自稱大夫奉貢朝賀賜以印綬安帝永初元年倭國王帥升等獻生口百六十人願請見是後倭韓俱屬帶方郡也魏景初二年既平公孫氏倭女王遣大夫難升米等詣郡求詣天子朝獻太守送詣都乃以金印紫綬封爲親魏倭王難升米等并拜中郎校尉假銀印青綬勞賜優渥正始八年倭女王卑彌呼與狗奴國男王卑彌弓乎素不合遣使詣郡說相攻伐狀遣塞普椽吏張政等齎詔告諭之卑彌呼死宗女一與嗣遣使入送張政還因獻男女生口貢白珠異文雜錦晉武帝安帝時俱遣使入貢宋武帝永初二年詔曰倭讚遠誠宜甄可賜除授文帝元嘉二年讚又遣使奉表獻方物讚死弟珍立遣使貢獻自稱使持節都督倭百濟新羅任那秦韓六國諸軍事安東大將軍倭國王求除正詔可珍死子濟立元嘉二十年遣使奉獻詔授節如故濟死子興立孝武大明六年遣使奉獻詔授節亦如故興死弟武立順帝昇明二年遣使上表言自昔祖彌躬擐甲冑跋涉山川不遑寧處東征毛人五十五國西服衆夷

六十六國陵海北九十五國王道融秦廓土遐畿累葉朝宗不愆于歲道經百濟裝飾船舫有句麗無道同欲見吞臣亡考濟方欲大舉奄喪父兄使垂成之功不獲一簣今欲練兵伸父兄之志竊自假開府儀同三司其餘咸假授以勸忠節詔除武使持節倭新羅任那加羅秦韓六國諸軍事鎮東大將軍梁武帝卽位進武號征東大將軍陳平至隋開皇二十年遣使詣闕求法華經大業三年遣朝貢使者曰聞海西菩薩天子重興佛法故遣朝拜兼沙門數十人來學佛法國書曰日出處天子致書曰沒處天子無恙云云帝覽之不悅明年遣文林郎裴世清使倭國其王遣小德何大禮奇多毘從二百騎郊勞設儀仗鼓樂迎至彼都其王與世清來貢方物此後遂絕至唐太宗貞觀五年遣使入朝帝矜其遠詔有司無拘歲貢遣新州刺史高仁表往諭與王爭禮不平詔不宣而還久之更附新羅使者上書永徽四年其王孝德卽位遣律師道照求佛法獻琥珀瑪瑙時新羅爲高麗所暴高宗賜璽書令出兵援顯慶二年豐財遣僧志智通輩求大乘法相教越明年天智遣使者偕

蝦蟇入朝咸興年持總遣使賀平高麗長安元年聖武遣朝臣真人粟田貢方物求書籍武后宴之麟德殿授司膳卿還之開元四年聖武復遣粟田輩請從諸儒授經詔四門助教趙玄默卽鴻臚寺爲師獻大福巾爲贄悉賞物貨書以歸其副朝臣仲滿華不肯去易姓名曰朝衡歷左浦闕久乃還天寶中孝明復遣朝衡單貢求內外經教及傳戒是時新羅梗海道始由明越州入建中元年白壁遣二僧靈仙行賀真人興能禮五台山學佛法元和元年桓武遣騰元葛野野空海大師及延歷寺僧澄詣天台山傳智者上觀義歷二十年還開成會昌中仁明遣僧禮五台大中三年僧慧諤自五台山得觀音瑞相欲返故國舟抵新螺礁諤禱之曰使我衆無緣見佛尙從所向建立精藍有頃舟行泊潮音洞下乃于雙峯山卓庵奉之呼爲不肯去觀音院光啓元年光孝遣僧傳教至梁龍德周廣順中仁和封上俱遣僧貢宋雍熙元年守平遣僧齋然其徒五人獻銅器十餘事并日本職員年代紀一卷上召見存拊甚厚賜紫衣給鄭氏註孝經一卷記室參將軍任希古越王孝經新義一

卷印本大藏經一部越明年附台州寧海縣商船歸後數年遣弟子奉表謝又別啓貢佛經及方物咸平五年建州海賈周世昌遣風飄至日本七年還與其國人藤木吉至上召見之以國詩獻其詞雕刻膚淺無取賜裝錢遣歸景德八年僧寂照等八人來朝詔號圓通大師賜紫方袍天聖四年明州言日本國太宰府還人貢方物而不持本國表詔卻之是後不通朝貢南賈傳其貨物至中國熙寧五年僧誠尋至天台止國清寺願留州以開詔使赴闕獻銀香爐木棹子白琉璃等物神宗以其遠人而有戒心處之開寶寺併賜僧伴紫方袍元豐元年明州又言得其國大宰府諜因使人孫忠等還遣僧仲回貢色段二百疋水銀五千兩州以孫忠乃泛海商人且貢物與諸國異請自移牒報而簽其物直村仲回東歸從之乾道五年附明州綱首貢方物淳熙三年其國人泛海遭風飄至明州無口食詔給之又有百人行乞于市至臨安詔守臣支給津遣往明州養贍候有船便發回十七年七十二人飄至秀州華亭紹熙元年飄至泰州詔見行貨物免抽買船悉與給還仍給常平

賑恤慶元六年至平江嘉定二年至定海詔並支給錢米養贍候風便  
津發宋自中葉歷久無貢元世祖遣使詔諭之不從乃命范文虎率兵  
十萬征之至五龍山暴風破舟敗績終元之世使竟不至逮國朝洪武  
四年國王良懷遣使僧祖朝貢七年復來以無表文卻之其臣亦遣僧  
貢馬及茶布刀扇等物以其私貢亦卻之十四年國王遣僧貢方物不  
恪卻其貢僧人發陝西四川各寺居住著爲訓示後絕不與通至二十  
五年復來詔定爲貢期約十年一貢太宗嗣登大寶國王嗣立皆受冊  
封自是或二三年或五六年貢無定期皆詔至京師燕賞優渥捆載而  
歸是以其貢而來也于利而不予義往往各道爭先受遣之爲幸正德  
四年南海道刺史右京兆大夫細川高國強請勘合遣使宋素卿貢正  
德六年西海道刺史左京兆大夫內藝與強請勘合遣使省佐貢嘉靖  
二年各道爭貢國王源義植嗣位幼冲勢不能制大夫內藝與遣使宗  
設謙導細川高國遣使瑞佐宋素卿交貢舟泊寧波港互相詆毀宗設  
謙道等持忿執銳仇殺宋素卿伴從追至紹興所過地方莫不搔動藉



使不蚤爲之計則寧波幾爲所屠矣吁四夷咸賓固帝王之盛節然貪狡若倭挾虛以窺厚利而使吾民之膏竭于供俸吾民之命懸于鋒鏑父母斯民者亦何忍樂受其名而不惻然于中耶

日本古倭奴國在大海中于閩浙爲東北隅其國主以王爲姓世世不易文武官僚亦然有五畿七道統郡至五百七十三然皆依水附嶼大者不過中國一村而已戶可七萬餘課丁八十八萬三千有奇自元師討日本者沒于水不得志日本亦絕不復來貢高祖初遣使臣趙秩諭降之僧祖朝來貢方物十三年丞相胡惟庸謀叛令伏精兵貢艘中計以表裏挾攻卽不遂掠庫物乘風而遁會事露悉誅其卒而發僧使于陝西四川各寺中著訓示後世絕不與通于是遣信國公湯和等沿海規畫自南直隸山東浙江福建廣東西成置行都司以備倭爲名大牙盤錯矣永樂初太監鄭和等齎賞諭諸海國日本首先歸附詔厚賚之封其鎮山賜勘合百道與之期其十年一貢無何三千人犯遼東爲都督劉江所破殺無噍類自是斂跡不敢大爲寇而小小抄盜亦不絕或

其主不知也其貢則恆多先期而至要以利中國給資與互市爲利耳  
嘉靖初其主幼冲不能制羣臣右京兆大夫高貴使宋素卿貢亡何左  
京兆大夫內藝興遣宗設貢或強請勘合後先至寧波爭長不相下宗  
設衆盛給宋素卿遂攻敗之追北至紹興贖諸郡縣殺掠以千計都指  
揮劉錦及千百戶等官過遇之皆死後以詔旨諭且下宋素卿獄始肯  
聽徐徐解自是有輕中國心矣而中國亡命者多跳海聚衆爲船主往  
來賈閩浙之間又以財物役屬勇悍倭奴自衛而閩浙間奸商猾民瞰  
其利厚私市違禁器物咸託宦豪庇引有司莫敢誰何黠者又多取其  
資匿去莫與酬船舶人怒則輒有所殺害而他船不爲商者又行剽掠海  
中漸彰聞朝廷慮之乃特設閩浙巡撫開軍門所以軍法從事而所用  
撫臣朱統素潔廉然銳果壯往則日夜練兵甲嚴糾察數尋船舶盜淵藪  
破誅之而又嚴根株通海者令迫急諸豪右咸惴惴重足立其仕宦貴  
臣相詬統不休竟以擅殺逮統及置二司用事者于理統恚自殺乃罷  
巡撫不復設而舶主士豪益自喜爲奸益甚官司視以目莫之禁矣壬

子賊始犯台州破黃巖象山諸邑議復設提督都御史用王忬爲之時沿海衛所軍久廢弛不習戰軍府草創財用殫屈忬于是益召募驍勇委良將申約束屢謀其巢穴覆之斬獲以千計於是移舟而南犯吳松郡二郡固都會素沃饒而其民愚怯弱賊至則咸懷散不支捆載而去所被攻剽郡邑爭以檄書上聞巡撫操江憲臣相繼罷而忬又以雲中急改節鉞天子數憂東南計用張經矣倭賊勇而黷不甚別生死每戰輒赤體提三尺刀舞而前無能捍者其魁則皆閩浙人善設伏能以寡擊衆反客主勞逸而用之此所以恆勝也大羣數千人小羣數百人比比蠅起而船主推王直爲最雄徐海次之又有毛海峯彭老生不下十餘帥張經者南京兵部尚書也朝計調二廣狼土兵討之而經舊嘗爲彼總督有威惠經亦慷慨以平賊自負故用爲大帥節制當天下半得以便宜行事開府辟召諸郎署參佐中外忻忻謂賊旦夕盡矣然經素貴侈靡行事有承平風而諸特用大將何卿沈希儀等名位極老而驕新進之士又慄猶果往速退田州瓦民及山東搶手兵連戰敗去經望

實稍稍損矣而侍郎趙文華出督察文華由上疏行有所負挾頤指凌經而經以大臣自重出其上文華恚則疏連劾經謂其才足辦也特家閩避賊仇故嘆惜縱賊耳而會兵科亦有言上怒甚趣使捕徵經經則已聚兵大破賊于嘉興斬首二千級溺水死者稱是兵科言宜留經以賊平自効不聽併巡撫李天寵皆論死文華旣以攘其功則奏起巡按御史胡宗憲代天寵督臣亦有更置由是中外文武惴惴重足立憂不在倭矣文華俄還朝進太子太保工部尚書而宗憲亦遂以兵部侍郎總督無何徐海入寇圍巡撫阮鶚躡浙地告急疏上尚書趙文華請出督許之其進止機宜如張經加重乃以宗憲誘徐海降而合兵掩捕平之海死進文華少保宗憲亦遷右都御史又明年獲王直王直故徽人也以事走海上後爲舶主頗尚信有盜道雖夷主亦愛服之而其姓名常借他舶以是凡有入掠者皆云直主之蹤跡詭秘未可知也宗憲亦徵人乃以金帛厚賂誘之云若降吾亦以若爲都督置司海上通互布而直亦自奮言必能肅清海波贖死命宗憲與之誓甚苦直信之從入

杭州宗憲具狀聞上然不敢悉其故廷議以直元兇不可赦棄市宗憲亦得加太子太保餘遷賞有差然其衆無歸者而寇復犯淮揚不利連犯吳越巢閩守首尾七八歲間所破城十餘掠子女財物數百千萬官軍吏民戰及俘死者不下數十萬雖時有勝負雅不相當而轉漕軍食橫賞賜乾沒入橐中者以鉅萬計天下騷動東南髓膏竭矣

卜大同字□□秀水人□□□進士歷官福建副使時會海寇挾倭作亂所在皆震而閩爲禍首時論推君才擢福建巡海副使客有問海事者君應曰倭所處聯絡海島譬如颶風掣電猝絕之難恃備在我耳夫禦外者必內固今不吾固而與倭逐是馳颶擊電鮮克濟矣乃趨駕至海上簡卒武謹烽堠控險要大治樓船積糗糧以待賊又輯備倭圖記授吏士言甚悉初閩人多入海與諸夷市而漳泉爲甚縱弗禁則法廢禁嚴則奸民失利而倖亂往往導賊入或且攘臂羣起以張賊勢最號難治而海禁兼莞利權下者既多自敗其名潔廉者又率避弗肯爲以故海防日益廢弛獨君毅然任之既修飭內治諸所興革一切與民

爲宜民咸安其政賊亦知有備終君任三年弗犯閩而屢寇甌會吳越間攻掠城邑數千里被其毒至動天下之兵而不能制獨閩得君晏然君卒後二年乃始告警云

嘉靖二十八年有夷人行劫至漳州官軍邀于走馬僊擒九十六人巡視都御史以便宜斬之然所獲實滿刺伽商人及閩中累年接濟者非眞賊也因下令捕賊又令并海居民素與番人通者得自首不則許相告于是人心洶洶轉相誣訐而諸奸人在海外者恐不得歸歸又恐事覺罪死遂勾引諸島夷及海中大盜所在遽起時中國息戰已久出無行伍止無營壘望賊皆走而倭奴趨近風飄入內地者莫不得所欲而去于是轉相告語唯恐不得來也而中國大猾爲之謀主數年之間東南諸郡騷然嘉定尤甚

嘉靖三十一年秋海上始有倭船一在吳淞所一在七鴉口一在崇明沙人不滿百皆飢困登岸竊食在吳淞所者殺百戶馮舉宗先我兵獲二人乃中國亡入倭者賊入據楊氏宅洞其牆屋四望徐俟而船南走

我兵追之賊匿蘆葦中以免在七鴉者爲居民楊氏所執凡十餘人婦女四五人多倭也在崇明者有巡檢給之曰棄爾兵刃當與爾船賊遂投刃海中獲二十餘人自言船主龔十八與倭夷往來與販販惡風飄入朝鮮朝鮮人襲之死戰得脫乘便風七日至此本非爲寇也既知我兵易走乃有輕中國之意也

嘉靖三十二年閏三月復有倭船入金山衛備倭指揮王世科本府同知任環合兵捕之命吳淞百戶張治以五十人爲前鋒治頗有斬獲已而中鎗死衆遂潰環身被三矢明日賊緣海岸避去環山西人忠義出于天性戰必爲士卒先屢至危殆而意不少挫所被衣甲以至襦襦行膝皆書名氏蓋恐戰死以識其屍也愛養士卒人人得其歡心父亦非庸人從山西來入子舍見囊橐無餘物喜曰可稱任氏子矣一日遂歸夏四月知縣萬思謙至海上給軍餉見海中賊船數十艘冉冉而來知必深入亟馳歸爲城守計明日賊已趨黃姚入劉家河登岸殺人矣將掠婁塘幾爲韓氏所敗明日以二百人至韓氏不支而走遂大掠所獲

財帛不可勝計又北攻太倉三日之間燒其東南西門及其倉中積粟軍民嬰城自守而已復轉掠吳淞城不可守遂入之西掠月浦及羅店五月三日進薄城下乘東風縱火燒廬舍烟燄漲天城上人不能張目思謙叩首籲天風反而西有應天府檢校張大倫固原人以善射適至城中驍賊六人奮而過濠大倫射之貫一人項一人中目扶去一人爲鐵丸彈中其面一人弩中左手拔矢笑示城上人曰此可傷人乎言未畢一矢中其耳乃投弓去遂焚掠劉家行南入上海殺一縣丞及太倉衛指揮武尙文至吳淞殺百戶卜相陶成臣從容置酒登舟而去

嘉靖三十二年十一月乙巳倭由上海七灶洪登岸流劫及于嘉定至二十九日始去詔巡按御史孫慎勤報倭殺擄嘉定吳淞文武諸臣失事之罪都御史彭黠言嘉定太倉上海被倭患特甚請破例優恤報可是歲賊首蕭顯等率五百人據南沙官軍焚其舟以絕歸路而南沙多積粟欲困之終不可得副總兵湯克寬新受命討賊克寬父慶前爲總兵平秦璠王良者也旣將家子意頗輕賊天未明發兵登岸顯先置伏



于旁兵半至伏起我軍前後不相應遂大敗死者千餘人克寬收兵還蘇州同知任環以民兵守之賊不得走蕭顯者廣東人書生也多謀善戰爲王直所憚江南之事顯實首之獲華亭涇人楊元祥問以城中金帛數元祥言府庫之藏已遷入蘇州不若南翔之富也遂導之以南道中見經絡者取以爲戲婦女猶爭不肯予至南翔市人乘屋而以瓦石擊賊賊頗有傷者顯命眞倭數人登屋斬衆遂潰去時商賈轉于南翔金寶山積賊取之不能盡大快意而去元祥因乞歸顯必欲攜之見船主船主日本人不知何名也顯見叩頭陳元祥之功殺牛羊以祭海因厚遺之將遺三十倭人送至其家元祥辭乃給以令箭而歸

三十三年元旦任環歸府我兵不爲備賊得舟渡復至城下知縣萬思謙方築城成賊不能攻遂掠南翔廣福屯海上賊兵戰不利太倉人巡視浙江都御史王忬遣將盧鏜浮海至賊駭而去環陞兵備僉事與鏜討賊鏜以克寬不可恃獨將其兵進賊犯我兵鏜堅壁不動賊意易之居二日出掠如故鏜以舟載荻與賊相近潛要賊歸路薄暮賊歸我兵

迎戰已而火起賊望見謂焚其舟奔救之伏兵四起賊大敗斬獲過半  
餘衆南走鎧恐軍士戀金帛不急追賊盡焚諸舟及賊于青村就圍之  
會兩賊乘間潰圍去鎧還松江曳不用命者斬之三月望賊首劉三以  
二百餘人入吳淞江登岸劫掠適克寬兵自松江至臨戰我兵且進且  
卻召把總田口將斬之對曰兵船本出耆民素不相統無以責其用命  
卽召耆民施大鯨斬之衆皆股栗復戰邳州兵退者又斬以徇由是士  
皆死戰賊潰奔匿舟中我兵甲夾岸攻之矢砲交下賊悉就擒無一人  
免者賊之始至不滿百人再至不滿千人是歲夏四月連結諸島衆以  
萬計州縣各被圍不能相救是月賊至城下幾陷者數矣一夕賊已登  
陣取燈有童子覺之大呼守者起擊賊賊乃退復有賊五百餘歸未至  
島颺風漂至海上六月朔由縣西門趨蘇州又南掠吳江抵松江有別文  
毘陵唐太史所從受鎗法者也適至縣士大夫留以爲城守計賊方急  
攻時四日間射殺二十七賊傷者三十餘後失董僉士邦政意拷掠數  
千折其足年八十餘老死邑中八月倭自嘉定還屯采淘港時調青徐

長鎗手六千人適至以參將李逢時許國統之以參政許大倫副使周臣爲監軍以南京兵部郎中譚綸盛唐爲贊畫相見禮如平交轅門既開六人皆南面而坐識者知其必敗矣賊聞大兵至佯迎戰戰輒走欲誘致之嘗遇賊于新涇夾練祁而射飛矢蔽空賊先引去由是長鎗手日揚兵于四郊民間寡髮者則斬其首以要賞有里長日給事縣庭亦爲所殺縣令楊旦哭而訴之參政翁大立大立以告贊畫綸繆解之曰兵氣欲揚奈何阻之大立憐然而起曰是何言歟國家命公等爲民誅賊乃殺民以充賊耶一日長鎗手又斬首以獻旦言非賊乃婦人耳大立問何以識之旦言人頭男必俯女必仰驗之良是亦竟不問于是長鎗手益橫日夕所須皆強取之民間醴壺醬甌無免者及兵出之日什什伍伍掉臂而去兩參將不知也賊舟在采淘港皆蒙絮被寂若無人長鎗手亂射之不動海潮旣至諸浦皆溢賊十六人從蘆葦中躍出長鎗手大亂相蹂踐爭入水亦有跪而請命者凡殺三千餘人敗兵絡繹入城城門終夜不閉人謂是時賊以十人躡之則一城塗炭矣賊旣勝

猶不入海泊舟老鸛嘴明年正月二日移舟寶山我兵追之獲一舟斬六十級遂與柘林諸賊合

三十四年冬十月僉事董邦政以嘉定兵擊賊于寶山時官兵列陣山前賊在山上相持久之耆民嚴大邦年最少獨從山後潛上援槍大呼襲其背賊陣動我兵大呼而登斬首九十八級閏十一月癸酉川兵遊擊曹克新與倭戰于高橋斬首二十八級自辰及未酉陽兵先潰諸軍遂敗乙亥克新復以蜀中土漢兵分三哨衝賊左哨天合上兵及筠連弩手斬七十餘級右哨酉陽色梅兵復潰我軍遂敗爲賊所乘大渡河千戶李燦成都衛百戶鄭彥昇皆死川兵死者十四諸軍奪氣是時調至客兵太多督撫率無長略不能以恩威馭之遂暴橫不奉約束川兵與山東兵鬪參將尙允紹幾爲所殺及出戰人自爲進退酉陽兵旣敗奪舟竟歸蘇州視師侍郎趙文華犒而留之不敢詰也是歲調至田州東蘭那地南丹歸順諸州狼兵五千永順保靖兩宣慰司土兵六千夾以嘉定之民勇與賊戰于吳江之王江涇互有勝敗賊知客兵不足畏

肆掠如故

夏五月倭二百餘人進泊黃姚舍舟登陸掠婁塘無所得北去合諸賊轉寇諸縣入太湖登洞庭西山大掠而還犯常熟江陰殺兩知縣駕舟出海南至吳淞江把總劉鏜以舟師遮之轉戰至寶山洋破其三舟斬首一百五十餘級生擒五十七人又明日賊入民家參政任環以民兵攻之不克乃以火投之盡燒死凡五十餘人事聞知賜知縣楊旦白金二錠

王直者徽人也故與浙人徐惟學李大用入海通番既而悔之二十九年八月嘗捕斬海寇陳嶼主及其黨二三百人欲以自贖而有不急救之直素爲倭所信服既不得歸遂率倭入寇陷昌國破乍浦犯杭州入南匯攻嘉定據吳淞民甚苦之後爲總督胡宗憲誘而誅之

總督尙書張經被劾就逮以兵部侍郎楊宜來代賊聞之自柘林移據周浦冬十一月宜帥兵薄周浦賊遁入海把總劉鏜復破賊斬獲溺死者千餘賊復入吳淞江官軍焚其舟賊登岸據青浦法昌手與戰不利

賊南擄乍漚

三十五年宜亦被劫去以浙江巡撫胡宗憲代之夏四月賊大舉入寇南至兩浙北至淮揚皆爲騷動二十六日賊聯二百艘泊采淘港掠我東境遂南寇上海華亭退泊吳淞西岸數日出海

四十四年四月倭寇犯通州呂四場官兵卻之轉掠至江南三沙副總兵郭成邀之于海沉其舟擒斬百三十人初温州捕一人本廣東揭揚人李七師爲日本贅壻言賊以去歲得志于黃巖故大舉而來今年若不遭挫輒明年必傾國至矣倭奴燕尾箭張綿布可以收之鳥嘴銃以鹽水漬絮被可以障之梯而登城以灰罐火藥投之水戰而兩船相比不可登其船用火攻之則投于水彼習太白符訣賊搖扇我以草薦亂撲之賊亦舉草薦我以箬笠亂撲之彼知我通其術必遁矣

張汝濟字澤民先從養父姓司名汝霖號儔野汶上人隆慶戊辰進士歷官右副都御史常巡撫福建時有倭寇兵曹題允抽沿海兵船集天津防禦公念由閩海船天津相距萬里有如萬一不測是以有用之舟

填鯨穴而以將士命委魚腹也豈不惜哉請以舟值匠作任便疏入獲免國中將士如獲更生

□□□曰昔海上自劉江之捷而倭寇不敢犯弘治中曾一見之未及岸而去乃今嘉靖庚戌始來犯我浙直連歲大被其害時有徵人王直爲之釣引則有胡總督宗憲遣諸生蔣洲陳可願充使以說直來誘而執之自是乃數年平靖方倭之圍我崑山犯我楓橋一帶火光與喊聲震曜城中予時避居盤城內晝夜恐懼時則任二守環赤心爲民以身扞賊六合董尹邦正調至相與協守倭便于用二刃仰而上跣足躍而前人無不失措且多詭謀知我所恃者砲石乃疎布伏兵出前後兩腋故難與敵乃調集狼兵苗兵擁衆而夾擊之乃克而苗狼之來沿道亦甚被其害所謂不得已而用昨萬曆己丑乃忽攻高麗朝鮮克其國都其主乃奔我求救我乃命將李如松及諸邊將助之戰平壤城下殺傷相當彼乃引去住近島未肯歸聞彼將關白將圖篡其主已久遣使請朝貢通市乃命重使答之久未見結成高麗王反國然尙冀我助之守

我將帥若如松父成梁北邊良將也其父子兄弟同心爲國昔有戚繼光俞大猷劉顯湯克寬皆我之良將時與倭逐者也嘉靖間欲討交趾時則毛伯溫總師竟不能平而姑聽其納款若先朝有謀略者馬文昇王守仁韓雍翁萬達王瓊彭澤輩皆可稱而守仁之功烈尤著卽有毀之者云其人有莽操溫懿之才嗚呼若此人何以自効哉



西園聞見錄卷之五十七目錄 外編

兵部六

海防前

前言

佚名

楊守陳

戚繼光 四則

佚名

佚名

王家屏

沈一貫 二則

韓世能

盧奇 十三則

王有麟

鄭以忠 二則

俞大猷

唐順之 二則

蔡汝蘭

鄭若曾

戴冲霄

方廉

温景葵

金魚

西園聞見錄卷之五十七

外編

嶺南 張 萱子孟奇甫 輯

兵部六

海防前

前言

□□□曰瓊州四面環海綿亘三千餘里內防黎外防倭頌黎小訂業  
勦定矣惟是海賊李茂旣撫復勦羣徒益橫難捕而邇且紛從採珠中  
瓘勾夷剽劫守禦之方不可後也國初設巡司于碭州所以控扼海道  
北捍高州正統間移入內地致使碭州無兵防是撤其南面之藩籬則  
修復誠便計也陽江之海陵巡司東有海陵寨西有賊船寨畏四面風  
常爲賊船所潛泊向無哨兵不可不增議守也望岡寨爲新寧南門之  
外戶要害地屯兵防禦則左可以援尾山海之緩急右可以翼寨門海  
之策應不可不增修汛防也東莞洋之老萬山海寇每每停泊惟南頭

西鄉捕魚柴船知消息則探哨宜急使也惠郡有碣衛統五所又有三守禦所以扼海道自設總督于梧州乃調各所軍往守城空此備彼非計也潮之柘林爲東路第一關鎖向時戰船秋盡掣泊水寨賊搗虛之謂何不可不築堡固守也凡此皆廣東之宜增者漳浦之島尾南靖之九龍塞溪龍溪之海門晉江之深滬額窟興化之冲心平海皆寇閩之要衝而防之貴謹連江條福郡門戶卽有小理海壇之兵爲之衛乃本縣至今未有城郭之設則守亦奚固而圖之貴亟福寧州如舌吐海上三面皆險往設烽火寨于三沙海面後乃內徙松山而外險失備矣須令官井羅浮沙啞南北中三哨羅江古鎮兩哨聯絡策應庶可恃爲福州之北藩也而籌之貴周凡此皆福建之宜增備者金盤海外之備若大岩頭山玉環山霓臺南龍山南麂鳳凰山凡五獨南麂臺闊大坐臨深海山外大洋別無山島賊自國初以來俱假此棲泊竄巢穴之宜防者也松海之信地惟是健跳城三面峻嶺東逼巨海而桃渚旣阻鳥道昌國復隔大洋懼援兵之未易達也計惟一報警卽調海門關兵船抵

所城東海山內設伏以邀擊之則萬無一悞也昌國海中防凡十有五處而八排門寨多腴田葑山正對日本牛欄基逼近石浦則又南北中哨之尤要者也定海之舟山故縣址也中爲里者四爲寨者八十三五穀魚鹽之饒可食數萬衆賊所必窺以爲巢海大港多而哨船不多奚以禦之夫此不大集兵屯守非所以壯寧紹之外藩則舊制宜復也臨觀總守海岸者七守海港者八惟是三江港省城第一關鎖而烈港尤入臨觀之要境則其險宜據也海寧總守海岸者十守海港者三惟是西海口南通大洋北近平湖係浙西之咽喉本港口海塗高硬潮水長涸不一船難擊泊議爲開濬建閘將各兵船浮泊活水遇警出勦斯預防之計也凡此皆浙江之宜增培備者上海之高倉渡沈莊塘周浦閘港閔行華亭之葉謝曹涇張堰等浦口懼賊一登岸而搶船之易渡也宜集雙塔等船以兵衛之長洲則連柳湖吳江則通鶯湖吳縣則逼太湖懼賊入內地而突犯之甚易也宜于勝墩并太湖近蠡里等處分兵守之江陰靖江之間居恆盜賊出沒而沿江哨望僅存空墩南北邏

卒不相聯屬則巡江都御使宜往駐其境時整飭之京口要區城逼山  
難守宜積粟廣城以厚鎮之凡此皆蘇松常鎮之宜增備者通州乃賊  
登狼山之所必窺而戍兵半占于勢豪若之何勿清查乎呂四餘東等  
場乃大河通州掘港三路之投而居恆又多鹽盜若之何不更練民兵  
備緩急乎海安鎮當六路之衝爲揚泰襟喉若之何僅以數邏卒爲備  
乎廟灣以西若北沙馬邏二鎮兵皆單弱而柳樹灣又僅通淮安一線  
若之何可無扼吭之重兵乎凡此皆淮揚之宜增備者東省沿海夾倉  
等十九巡司其墩寨與衛所烽墩輪次綉錯俱有協防之任而弓兵爲  
數殊儉不可不議添置也膠河自麻灣抵海倉口故大渠便漕復便屯  
而惟是陸家村至分水閘一帶崗鈎石爲梗鑿此成渠誠萬世一大利  
也六都司所領班軍二萬一千五百有奇留若地可屯可守况其衆則  
恆懷跋扈之志孰與分布沿海之猶資一臂乎則不可不罷番上也登  
萊之島嶼不設險以朝鮮爲之蔽耳頃鮮且岌岌矣曷不如浙直之廣  
置遊兵且以防民之橫決且以遏外寇之窺伺便計也凡此皆山東之

宜增備者自剗以達遼近議各路共設戰哨等艦以五百十餘隻計設大小車輛以千七百計設大將軍虎蹲砲佛郎機鳥銃等火器以萬計他戰守具且稱是而未覩果無虛額則綜核不容或疎矣鴨綠西之鎮江地方遼曠兼有虜患顧此失彼且當援鮮餉道要害議爲特設鎮道控華夷關局聯水陸軍爲登萊左轉而未覩奉有成命則疏請不容終已矣凡此皆剗遼之宜增備者

楊守陳與沈夷齋論海道書曰敵府在成化弘治間並無通番者亦從無海寇之擾正德末年始漸有之然亦只一二人可數今往通番者不可數計而海賊之擾年甚一年亦不可以數計矣使先嘗通番原無寇今因禁而致則當開禁以通之近日海寇之多實因人頑禁弛所致其受病之源蓋可知矣

或者曰兵船當在船上操豈有取兵下陸地而操水戰之理耶戚繼光曰海舟比江中不同戰賊之時惟用風力帆檣之功但有舟利帆速者隨便勁上以鬪船之力耳海中風濤潮汐非內地江湖搖櫓整次之比

也舟中旣不能操矣而不取于陸而習之幾于棄之也或又曰取之操于水寨是矣而又何以陸操繼光曰水陸之分可恨正在此逼賊登山將不舍舟步戰乎哉或者曰然

又曰小舟數往來者謀議也遲而審顧者疑我也欲進而復退者探我也旣退而卒進者襲我也鼓譟而矢石不下者兵器少也卻而顧者欲復來也先急而後緩者整備也促鼓而不戰者懼我也泊而揚帆者欲出不意也旣退而不速者謀也火光而呼譟者恐我襲彼也擲攬而卽起者欲擇其利也火數明而無聲者備器也夜泊而趨于涯者鄉道欲往也促攬而不呼者急欲逃也促攬及流懸燈于途者夜逸而責也久而不動者偶人也鼓而無韻者僞嚮也近岸連村而不登劫者怯也不久困而請和投降者詐也此乃兵法乎

又曰我舟在洋出哨追趕賊船天欲昏黃潮時將盡不可貪程一意前往須防今夜自安泊處恐無收暮風至可虞遇龍潭神廟不可放銃吹打吶喊或有驚動起風作浪之失早晚占看日月星辰氣色飛鳥預知

風雨來到晚便收寨巖登高四瞭恐隔山先泊賊船而我不防也

又曰江洋春夏潮大而速秋冬潮小而遲海洋每月初三至初七日十八至二十二日爲大汛潮大而速初八至十七二十三至初二爲小汛潮小而遲

□□□曰重水戰夫善保身者調其營衛則必心腹自寧善保家者慎其藩籬則堂奧自固若不加意于外防雖謹自保所損已多今日之慎守藩籬者惟有水戰一節耳今吳淞江劉家河福山港青村南匯等處皆有福船蒼船沙船以爲哨守分布非不密也但海洋空不守要害則賊來不能知賊去不能追總使能追亦已晚矣且賊船來乘風渡海勢雖聯絡飄蕩旣久筋力困怠故必于陳錢山丁興馬跡等山會集調理數日方始入寇爲今之計如大洋福船各港共得幾十隻此船惟利于深水大洋則爲之修其槓具堅其蓬纜預給兩月糧得熟慣忠勇將官一二員率領各船直至陳錢馬跡洋山等處擇其避風寒港停泊窺伺以小巡船十隻四面哨探遇賊流來則擊之此第一層藩籬也但此計



雖善而勞險難行人多阻之咸謂海島中不可泊船是以計雖善而終不行也其次樣蒼船各港共得幾百隻此船極利于乘風巡哨分爲三班每日一班出哨直出高家嘴外如一班三十隻遇賊來時則以二十九隻與賊對敵其一隻飛來港通報盡發各船出應此第二層藩籬也其小樣沙船惟利于沿涯淺水則亦分與信地延表往來巡哨遇賊來時有福船所不盡黜蒼船所不盡禦者則沙船兵擊之不使登岸此第三層藩籬也沙船又不能遏賊有登岸者始以陸兵禦之此第四層藩籬也如此賊來雖多恐得登岸者少矣

□□□曰據險要夫浙江與直隸地不同而備禦之法亦宜有異某生於浙東之瀕海官于直隸之瀕海其間形勢險阻皆目覩其詳而非按圖遙度者也浙東自溫台延袤至寧紹一帶皆有海塘田爛海低內河與外海不相通塘外有沙塗少者十餘里多者二三十里略無港汊可以灣泊賊船若至百姓望見皆收其貨貨挈其妻孥豫先走避賊至爛塗二三十里力已怠倦及至民家擄無所得船泊海灘潮退則閣淺遇

風則打碎是浙東之倭患略少者非兵之強備之善職此故耳若浙西與直隸自乍浦青村南匯以至上海嘉定太倉常熟江陰靖江延袤一帶內河與外海相通一里之內有港三四皆可以停舟避風塘外無沙塗賊船倏忽直抵海岸蛋民不及知知不及避據有所得則因根于我結爲窠穴官兵攻之則彼據其險我失其利及其深入則結夥數千勢莫能禦是以蔓延而不可遏也故浙東防禦之法止于定海普陀滬海三江等處各得數十兵船以守之卽可以無事矣若直隸沿海一帶乘今賊退之時急宜設備如吳淞江劉家等港極大者已有兵船抵禦其餘港汊如柘林七八團青水窪等處皆須設法堵塞或旋樁于港口投以連根大木或泊舟于窪內使我先據其險其海岸上每二十里內擇要害之地屯兵一枝各縣各率其人民各守其封域其勢大不能支者軍門發兵勦之必須初登海岸乘其饑倦勢易爲圖若旣登岸後卽難爲力矣此據險要者誠今日之急務也

王家屏曰防海者與其制之于岸孰若防之于海我師戰海而勝者常

十七內戰而敗者常十八其故有四士卒入海效死莫逃一也洪腫巨艦勢易凌賊二也毒藥火器且戰且焚三也賊載水而飲不能開口待鹵四也誠能守馬蹟諸山以控揚守大堵諸山以衛越守陳錢諸山以制賊往來之衝夾擊互救三道鼎峙賊不足防矣

沈一貫曰漳泉惠潮之間負山阻海擅沃饒之利其民喜鬪乍聚乍散有司急之不匿于谿崖篁竹之中則泛舟入海因風之所止泊而時出抄掠爲患諸郡此非獨習性然也亦爲使者安集不稱之效也夫人莫不好生而惡死願親戚而重離亡然而犯之不顧者以此之無以生之而彼之可以幸免也又仕于土者大抵多遷謫羈旅之人以此之人事乎其上也亦惟貨賄是望孰肯爲百姓爲久遠之計者二者相合釀成厲階上下憂虞以有今日然臣之愚竊謂兵不可玩威不可褻方今海寇蕩平則彼依山負險者雖懷梟獍之心必且喪氣乘此時而撫之使之銷兵刃治農器不爾則出兵勦之彼必惕吾之威而懷吾之惠其功賢于百萬之師遠矣此韓信收燕之策也其便一也旣撫之後蓬溫良

厚者治之退刻薄之吏開生息之塗節賦斂之用堅樂生之願使民重親戚而畏死亡其便二也又事至則懼事平則玩人之情也今能勅閩廣諸臣所在提戈之處詰戎兵時簡練以備不虞雖境安烽息考足資滿不得數易特增其祿秩以褒之使民安其土官習其俗其便三也古者鄉有長閩有師黨有正故什伍相維民用輯睦今倣此法立之保伍糾其習業稽其戶口則雖欲爲亂而不能矣其便四也君子欲立功名以自效于上甚于上之求下願爲之未見其成撓以衆議惑以浮言則誰肯以身博死者昔龔遂治渤海亦曰願陛下少寬文法今欲閩廣久安而無事莫若聽將吏以便宜治之不效然後治其罪毋從中而沮其便五也

又曰齊桓不信曹沫之盟晉文不趨代原之利非獨示信亦以勸來也今閩廣寇殺其黨已降非獨冀生亦以一人嘗我也如使懸賞格以來之又羅織其罪而殺之則他負國者曰朝廷之不可信如此此所謂禁之使歸而教之使叛是後無降者矣元至正中張瑄朱靖寇海上後降

而官之卒賴其用安知今日無此等輩乎

韓世能曰閩廣變之所由起者無籍之民嘯聚山谷連衡海寇互爲聲援彼海寇萍鳧而來則亦指爲內應故離之輒持角我師合之乃益張逆焰今長鯨就殪卽宜滅此朝食以絕禍本第閩廣之地並海千里首尾衝決不可相救今廟堂石畫軍旅不可久聚職守不可不明無亦講先時之舊典參以當今之善制舉兩廣仍轄梧州開府析潮惠仍轄贛州開府而福建自爲一開府職掌嚴明體統有定無事則控制境內有事則鈞連而出潮惠二郡去贛邇甚舊以相屬不爲無意閩廣本百粵之地外通諸番內接中國犀王金貝煜燿耳目而居民互市往來以射厚利遂令兇頑相構爲盜若乃仕其土者又率弋取長物虛往實歸往者賄官選曹率以萬金一郡千金一邑取官若此安得不苛求以自潤乎陵夷召亂其本坐此今若禁海市以絕奸商之覬覦則利孔所在民以死力赴之而卒不可禁欲嚴卒伍以限居民之出入則小民相容爲奸利吏不得問也問之則七首副其胸矣以臣計之其蠲租庸以輯流

民乎通市舶以睦諸夷乎練兵實以威羣醜乎而又責成于賢有司不可後也臣聞廣東之食僅能卒歲一有不虞輒仰食廣西今大軍之後饑饉必至流離之子豈任農作謂宜移粟轉餉以活元元復之數年無所徵取而後邑里可實也市舶之利國家行之二百年而敝于今日者有二焉法令奪于豪右而官方邪也如其戩吏貪使監權者無所利其人抑豪右使登壑者無所肆其奸則海內諸夷可繫而羈矣諸夷之強弗順者獨倭耳毒螫浙直幾二十年卒以一大創去苟能輯柔吾民絕彼嚮導簡練吾卒使生鬪心彼敢加一矢乎是故善爲之謀以制其鋒海夷之兵未可輕視也斯三者其事總之督撫而分之守令則表廉黜頑又爲之本矣

盧奇曰廣東列郡者十分爲三路西路高雷廉近占城滿刺諸番中路東莞等澳水賊倭寇不時出沒東路惠潮與福建連壤海船通番之所必經其受海患均也舊制每歲春汛各澳港皆設戰艦秋盡擊回泊水寨至今日則不然倭奴衝突莫甚于東路亦莫便于東路其次則南頭

等處又次乃及高雷廉三府勢有緩急事有難易分兵設備似當因之故舊例戰船中東二路不過二十艘今則各宜增益而柘林爲尤甚蓋柘林去水寨一日之程警報未易達寇若乘虛而入柘林危矣無柘林是無水寨也官兵每秋掣班必以柘林爲堡控賊咽喉附近大城所軍互爲聲援庶保無虞耳嘗聞南洋海鄉夫在東路屢勝眞倭鳥膽船子弟兵昔在中路首擒亞八此皆宜素養者編號定甲更番作息無事則隨宜農商以養其財聽用則時使休閒以養其力有警則預給工食椎牛釀酒以養其氣恩威相濟務得其心有不戰戰必勝矣雖然亦未也沿海港口賊船皆可衝入斷賊入路策之要也好民與賊交通餽之酒米餽之衣服餽之利器斷賊內交策之要也賊飄大洋洋水賊不可食食則泄不可盪盪則皮肉潰沿海之山多清泉水淡可以烹食斷賊饋汲策之要也防海者則又不可不知

又曰國初設巡司于碭州所以控扼海道北捍高州也正統間移入內地致使碭州無兵防守是撤其南面之藩籬也似當修復又如望岡澳

爲新寧南門之外戶要害地屯兵防守則左可以援尾山海之緩急右可以翼寨門海之策應宜屬廣海衛募兵二百名駕大船四隻武臣部領自四月風汛防至九月掣備矣

又曰倭寇擁衆而來動以千萬計非能自至也由內地奸人接濟之也濟以米水然後敢久延濟以貨物然後敢貿易濟以嚮導然後敢深入海洋之有接濟猶北陲之有奸細耳奸細除而後北虜可驅接濟嚴而後倭夷可靖所以稽咎之者其在沿海寨司之官乎稽咎之說有二其一曰稽其船式蓋國朝有片板不許下海之禁禁固嚴矣然濱海之民以海爲生採捕魚蝦有不得禁者則易以溷焉要之雙桅尖底始可通番各官司于採捕之船定以平底單桅別以記號違者燬之照例問擬則船有定式而接濟無所施矣其二曰稽其裝載蓋船雖小亦分載出海合之以通番者各官司嚴加盤詰如果採捕之船則計其應帶米水之外有無違禁器物乎其回也魚蝦之外有無挾帶番貨乎有之卽照例問擬則載有定限而接濟無所容矣此須海道嚴行禁法如某寨責



成某官某地責成某哨某哨某處定以某號某澳束以某甲如此而謂通番之不可禁吾未之信也

又曰惠邵南海之濱洪武中倭寇侵犯奏立碣石衛于海豐統五所又如沿海險要地立三守禦所以扼海道成化間設總督于梧州調各所軍以守城然空此備彼豈計之兩得哉

又曰大海相連地畫有限若分界以守則孤圍受敵勢弱而危戢捕之謀能不賴于須乎愚故入番罪犯多係廣福浙之人通番流劫南風汛則勾引夷船由廣東向上達于漳泉蔓延于興福北風汛則勾引夷船由浙而下達于福寧蔓延于興泉四方無賴又從而接濟之嚮導之若欲調兵捕勦攻東則竄西攻南則遁北急則潛移外境不能窮追緩則旋復合鯨有難卒滅此夷船與艸撤船之大勢也又有一種奸徒見本處禁嚴勾引外省在福建者則于廣之高潮造船浙之寧紹置貨糾黨入番在浙江廣東者則于福之漳泉等處造船置貨糾黨入番此三省之通弊也故福建捕之而廣浙不捕不可也而福建不捕亦不可也必

嚴令各官于連界處會哨如在福建者下則哨至大城千戶所與廣東之兵會上則哨至松門千戶所與浙江之兵會在浙江者下則哨至浙江等處與烽火之兵會在廣東者上則哨至南澳等處與銅山之兵會遇有倭警互爲聲援協謀會捕賊勢豈有不孤窮而海患豈有不戢寧哉

又曰南澳山在饒平巨海中周二百餘里因民梗化而遷除之至今不藉其地倭船番艘常泊焉廣兵捕之則逃于福洋福兵捕之則逃于廣洋誠爲極受害者又若潮州之柘林灣內有漳潮海寇外有暹羅諸番倭常泊舟于灣爲地方患洪武中始建大城千戶所于腹裏而外築烟墩以瞭望之

又曰烽火門水寨設于福寧州地方以所轄官井沙垵羅浮爲南北中三哨其後官井洋添設水寨則又以羅江古鎮爲二哨是在烽火官井當會哨者有五也小垵水寨設于連江縣地方以所轄閩安鎮北菱焦山等七巡司爲南北中三哨是在小垵塞當會哨者有二也南日水寨

設于莆田縣地方以所轄冲心莆福武等所司爲三哨而文澳港哨則近添設于平海之後是在南日當會哨者有四也浯嶼水寨設于同安縣地方上自圍頭以至南日下自井尾以抵銅山大約會哨者有二也銅山水寨設于漳浦縣地方北自金山以接浯嶼南自梅嶺以達廣東其大約當會哨者亦有二也

又曰由南而哨北則銅山會之浯嶼浯嶼會之南日南日會之小垵小垵會之烽火而北來者無不備也由北而哨南則烽火遊小垵南日浯嶼會之銅山而南來者無不備也哨道聯絡會捕合併防禦之法無逾此國初沿海設兵大牙相制爲衛者四爲所者十謂之正兵以備禦于內又爲募者五爲墩澳者數百謂之游兵以哨守于外且有黃崎等二鎮及洪淺等二十四巡司弓兵安邊等人捕盜民壯共爲之守焉尤慮地廣官疎難于責成隨地設官大小相維有副使一員巡視于上都指揮一員備禦于中而各寨有把總指揮各澳有哨守指揮千百戶安邊館有通判而巡捕巡檢等官又爲之分理焉平居則信地以守警報則

合力以攻一號召而兵船數百立齊一勦縛而兵夫數千響應此八閩邊海之防也

又曰三四月東南風汎番船多自粵趨閩而入于海其南寒雲蓋寺走馬溪乃番船始發之處慣徒交接之所也附海有銅山玄鐘等哨之兵若先分兵守之則有以遏其衝而不得泊矣其勢必拋于外浯嶼此乃浯嶼地方番人之巢窟也附海有浯嶼安邊等哨守之兵若先分兵守之仍撥小哨守把要緊港門則必不敢泊矣其勢必趨于料羅烏沙此又番船等候接濟之所也附近有官澳金門等哨守之兵若先會兵守之則又不敢泊矣其勢必趨于福興若越于福興計所經之地在南日則有岱墜湄州等處在小垵則有海壇連盤等處在烽火則有官井流江等處皆賊船之所必泊者若先會兵守之則亦不敢泊矣來不得停泊去不得接濟船中水米有限人力易疲將有不攻而自遁者况乘其疲而齊力攻之豈有不勝者哉

又曰閩地二面當海者興泉是也四面當海者福漳是也寇閩要衝晉

江之深扈額窟興化之冲心平海龍溪之海門漳浦之島尾南靖之九龍寨溪皆是也然莫有如福寧州之尤險者蓋地勢自西北而東南至于省城盡之矣而福寧又在東南突出海中如吐舌然其左爲甌括海居東面其右爲福興海居南面福寧獨當東南北三面之海倭舶入寇必先犯此水寨之設職此故也舊寨在州東北五六十里三沙海面永樂初用福州中衛左衛福寧衛軍守之正統間焦宏昌議風濤難泊從今松山之下似復舊而後行

又曰國初浙江沿海設把總四皆有大戰艦而惟海寧不設何也予嘗至定海登眺而默識之其外爲寧波洋與蘇州相對僅數百里浙之東爲寧紹西爲嘉興而杭獨處于西底乃腹內地未爲海也海上戰艦聞警卽出把截賊豈能直搗乎且海寧沙淺無可泊故在設備外戶而堂奧自安矣竊攷浙江諸山其界有三黃牛山馬墓長塗折子金塘大榭蘭秀劍山雙嶼雙塘六塘韭山塘頭等山界之上也雞山嶼山羊山馬蹟兩頭洞漁山三姑窰山徐公黃澤大小江大佛頭等山界之中也花

腦求芝罘華彈丸東庫陳錢壁下等山界之下也此倭寇必由之道各戰船有七百料五百料四百料二百料尖船之殊向因賊舟不大七百料停造久矣其五百料之數亦以不便海戰故造福清等船復調發廣東橫江鳥尾船雇稅沙倉民船又有小哨草撇船軍駕人漿船裝火器出奇兵伏別網船四參六總分哨守谷洋港每值春汛戰船出海其南哨也至鎮下門南麂玉環鳥沙門等山交于閩海而止其北哨也至羊山馬蹟灘許衢山等處交于直海而止陳錢爲浙寇分線之處則交相會哨遠探窮搜復于沈家門列兵船一枝馬墓港列兵船一枝並以指揮領之舟山把總兼督水戰賊若流突中界則二枝兵船北截過長塗三姑而與浙直兵船爲犄角南截過普陀青龍洋韭山而與溫台兵船爲犄角賊若流突上界總兵官自烈港督發舟師北截之于七里嶼觀海洋而參將又自臨山洋督兵應援南截之于金塘崎頭洋而石浦梅山港兵船爲之策應是故今日之海防自內達外有三重焉會哨于陳錢分哨于馬蹟羊普陀大衢爲第一重出沈家門馬墓爲第二重總兵

督發兵船爲第二重備至密也所患者海氣溟濛咫尺難辨風濤款急  
安危叵測兼之潮汐有順逆哨報有難易奸宄往往藉以規避吾何從  
而綜覈之哉自海上用師以來擊來賊者僅一二而要去的賊者不過文  
其故縱之愆識者謂宜以擊來賊之賞優于追去賊縱來賊之罰嚴于  
縱去賊風汎時月正副總兵不拘警報有無而親出海洋嚴督參總戮  
力用命以遏海寇于方來則何邊鄙不寧之有

又曰浙東地形與福建連壤浙西地形與蘇松連壤利害攸關如兵車  
相倚之勢故勅浙江巡撫總制直福分哨各官互爲聲援而不許自分  
彼此畫地有限責任相聯廟謨之所以爲善而海防之所以爲固也予  
攷海中沙南起舟山北至崇明或斷或續暗沙連伏易于閩淺賊舟大  
者不能東西亂渡如遇東北風必由下入陳錢馬蹟等山以犯浙江而  
流突于蘇松如遇正東風必由茶山西行以犯淮揚而流突于常鎮如  
遇正北風必由琉球以犯福建而流突于兩廣然地方寬遠瞭望難及  
須總兵官撥遊兵把總領哨千戶百戶算船往來會哨聯絡其在浙江

也南則沈家門兵船哨至福建之烽火門而與小垵兵船會北則馬墓兵船哨至蘇州洋之羊山而與竹箔兵船會其在蘇州也南則竹箔沙兵船哨至羊山而與浙江之馬墓兵船會北則營前沙林兵船哨至茶山而與江北之兵船會絡繹如長蛇羣力會集南北夾擊彼此不容此豈惟逐倭船于一時殆將靖禍患于無窮者矣

又曰信國公湯和經略海上區畫周密獨于舟山似有未妥者洪武間倭犯中界犯玉環犯小瀆皆浙東海濱信國所親見也其來自五島開洋衝冒風濤困眩精神者數日至下入陳錢而始少憩然孤懸海外曠野蕭條必更歷數潮泊普陀烏門之類而後得覘我兵之虛實以爲進止若定海之舟山又非普陀諸山之比其地則故縣也中爲里者四爲寨者八十三而五穀之饒魚鹽之利可以食數萬衆不待取給于外乃倭寇貢道之所必由寇至浙洋未有不念此爲可巢者往年被其登據卒難驅除可以鑒矣我太祖神明先見置昌國衛于上屯兵戍守誠至計也信國以其民孤懸徙之內地上設二所兵力單弱雖有沈家門水



寨然舟山地大四面環海賊船無處不可登泊乘昏霧假風濤之順襲至舟山海大而哨船不多豈能禦之予以爲定海乃寧紹之門戶舟山又定海之外藩也必修復舊制而後可

王有麟曰論閩事者往往以復江夏候舊寨爲說又有言其不當復者不知今之寨遊雖設在舊寨之內而其哨守常在舊寨之外其言當復與不必復者皆勦襲紙上之談而未親歷海上者也

鄭以忠曰杜接濟在乎嚴保甲重賞格而責之海防官夫接濟之船非可以朝具而夕發也聚貨裹糧動經旬月同井之人非不知也所不舉者是連坐之不嚴而賞格之未重也必于五六月南風盛發之候海防官多置耳目于沿海出船之地着實體探重懸賞格但獲通倭接濟之船盡船貨賞其所獲之人官府一無所問其接濟者俱照近例重處家甲知而不舉連坐夫用法有經權用于無事之時則宜寬用于有事之時則宜嚴要在使人難犯也

又曰浙洋沿海舊設四總後增爲四參六總矣四參者杭嘉湖一寧紹

一、台金殿一溫處一也。六總者定海昌國臨觀松海金盤海寧也。悉其防禦之制自內達外有三重焉。會哨于陳錢分哨于馬蹟羊山普陀爲第一重。沈家門馬墓之師爲第二重。總兵督發兵船爲第三重。備至密也。乃若定海者是寧紹之門戶舟山者又定海之外藩。其地則故縣治也。爲里者四爲畧者八十有三。五穀之饒魚鹽之利可供數萬人。不待取給于外。非若普陀諸山比也。國初置昌國衛于其上屯兵戍守誠至計也。信國公經略海上以其民孤懸徙之內地改隸象山其見左矣。都御史唐順之議復之。卽今屯兵戍守豈非守江必准之微意哉。

俞大猷曰自潭岸山以北以西之海水淺沙硬大船誤閣則破壞且無避風安嶼兵船至彼如遇夜必須當洋下椌椌不能堅每被急流飄去或夜半發風則尤危然多賴天幸要非安計然則宜如何曰錢塘江鳥嘴頭浦內船兵一枝不可無餘則練陸兵精卒一枝以待而嚴龕赭哨探遠諜馬庶救倉猝或曰賊舟何能此曰賊用單桅小舟徑抵山邊閣乾登劫故必用陸兵追捕方不走脫若以兵船必高大方能勝賊如與

賊舟等則勝負未可必也。今言禦賊于海也，易要非通論。海本遼闊，舟行全藉天風與潮，人力能幾風順而重則不問。潮候逆順皆可行，若風輕而潮逆甚難。夏秋之間，西北風起不日必極大，操舟者見此風候須急收安嶼兵船在海，每日遇晚俱要酌量收泊安嶼，以防夜半發風至。追賊亦要預計，今晚收泊何嶼，若一意前追，遇夜風起悔無及矣。

唐順之曰：江南控扼在崇明，浙東控扼在舟山，天生此兩塊土大海中，以障蔽浙直門戶。諸哨船皆自此分而南北總會于洋山，若會哨嚴緊，遇船即打，賊何從入？信國廢昌國故縣而內徙之，恐是千慮之一失，未可謂昔人盡是而今人盡非也。

又曰：賊入江由江兩岸登陸之路，廖角嘴營前沙南北相對，海面約闊一百四五十里，爲第二重門戶。周家橋與圖山相對，周家橋北岸至順江洲與江南分界，江面約闊六七里，順江洲至新洲夾江面約闊七八里，新洲夾至圖山南岸江面約闊十四五里，爲第三重門戶。三處領水兵官須整備船艦，晝夜緊守三門，勤會哨以防春汛。門戶既固，堂奧自

安若三門稍有疎虞至不得已而守金焦兩岸所謂下策與無策矣巡撫都御史翁大立題云今日海防之要惟有三策出海會哨毋使入港者得上策循塘距守毋使登岸者得中策出兵列陣毋使近城者得下策不得已而至守城則無策矣臣周行海壇分布信地視吳淞所乃水陸之要衝蘇松之喉吭也提兵南向可以援金山之急揚帆北哨可以扼長江之險以副總兵統兵鎮之自吳淞而北爲劉家河爲七丫港又東爲崇明縣七丫而爲白茆港爲福山又折而西北爲楊舍爲江陰爲靖江又西爲孟河爲圖山此皆舟師可居利于水戰臣皆設有兵船非統以把總卽統以指揮而又以圖山遊兵把總駐劄營前沙會哨于江北吳淞遊兵把總駐劄竹箔沙會哨于洋山常鎮參將統水陸兵據江海之交鎮守于楊舍所以備水戰者亦既密矣但吳淞而南雖有港汊每多砂磧賊可登岸兵難泊舟非選練步兵循塘距守以出中策不可也今自吳淞所而南爲川沙堡以把總練兵一枝守之川沙而南爲南匯所以把總練兵一枝守之南匯而西爲青村所以把總練兵一枝守

之青村而西爲柘林堡以都司練兵一枝守之此皆不遠六十里聲援易及首尾相應宛然常山蛇勢也柘林而西爲金山衛西連乍浦東接柘林類年皆賊巢窟添設遊擊將軍一員統領馬步遊兵往來遊徼則北可以護淞江而西可以援乍浦矣

蔡汝蘭曰台州遠處海濱誠四塞之國南有桃畧金竹北有桑洲桐巖西有關山衛墅疊嶂層岡重關鳥道眞可禦之險而且南去盤石楚門僅百五十里東南去松門僅百里東去海門僅八十里設或倭奴棄舟登陸皆可猝至城下自海門而上者則一朝直達實一時難禦之變也三面阻山一面瀕海孤懸于數百里之外救援接濟所難猝至者惟此耳曩者戚參將駐兵桃渚而倭奴屯聚桑洲運輸糧銀經月不呈孤危之勢誠可畏也今宜于台州專立督餉方面積聚糧餉訓練兵士以爲重鎮而且西控溫處金衢北衛寧紹權非遙制而威可近飭也

鄭若曾曰國初定海之外秀岱蘭劍金塘五山爭利內相仇殺外連倭夷歲爲邊患信國公經略海上起遷其民盡入內地不容得業乃清野

之策也趙侍郎近奏令民開種以給幕租與此利金塘一山即可墾田數萬畝歲入米幾萬石玉環諸山計之每歲可得米幾拾萬石大爲海防之助但其患二故當道屢議屢止其一 是倭人藉以爲糧結巢于此兵費反多其一 是大家爭佃秋糧難徵且無益于小民以愚計之須丈量爲屯田召民耕種輸賦軍門耕者搭棚廠而居不挈妻孥不得買賣逐歲更始如大家放租之法則官民兩利而爭奪之患免矣官差石工伐山造堡海洋有警小民避入賊知堡中無子女財帛自無結巢之念矣

戴冲霄曰議者皆謂玉環等山可興屯田之利以給幕租愚謂此等山古時有民居耕作信國公皆遷之內地不許其得業豈誠棄地利而不知惜哉亦念荒山起稅爲利不多卽以萬頃計之不過千石若寇據此以爲巢穴則攻逐之費不知幾倍是賣盜糧爲小而失大也故舟山止留二所瞭守而亦不許民屯種其爲慮至深遠今日備倭之策不必遠求查復信國公之制而已矣

方廉曰松江府自金山衛至南甌所官軍各分信地各有定額每歲二月上班十月掣班青村以東各洪港舊制係青村官軍把守南匯以北各洪港舊制係南匯官軍把守今查修復海塘須照舊分派但太倉鎮海嘉興同有倭患貼守官軍似難調發相應于金山青村適中如柘林地方南匯吳淞適中如七八團地方添設陸路把總二員各領精兵一千暫借民居劄營隨路有警相機策應此松江海塘設備之大略也若沿海港口金山以東有翁家港蔡廟港柘林滙缺等處南匯以北有五六七八九團洪口川沙窪清水窪等處宜設船防守按舊制金山衛所造船各有定額俱就各衛所派撥巡軍在海巡邏正統間因海患寧謐或以船爲虛費題准以江船易馬而哨船之制遂廢矣今議設船隻一馬之資不足以備一船之用官軍窮苦又難賠贖合令每馬二疋造船一隻再于衛所查有地租公費銀兩與松江府庫軍前銀內相兼轉數每船量貼銀十兩金山衛總委一官督造其各船應用器械火器合于原議太倉置造軍器內給發聽用就點各衛所知水軍人操習水戰

布列港口各分信地如倭賊突至而敢容其停泊者服以上刑自無規避之患矣此松江海港設備之大略也夫沿海設備固爲上策萬一外守不固則黃浦一帶又爲蘇松險要守浦乃所以守門戶猶有愈于守城也今吳淞江口卽爲黃浦口子既經設備而吳淞江所亦設兵一枝以防深入矣至于上海之高倉渡沈莊塘周浦閘港閔行華亭之葉謝曹涇張堰等處賊一登岸搶船渡浦甚易除松江府先後打造雙搭船鷹船各船撥上海華亭招募水兵分布沿浦各港巡邏把截又華上二縣各募鄉兵護守城池有警調至浦邊協守但前項兵夫官無專職則事難責成而沿浦二百里之遠本府巡捕官一人勢難管攝合令清軍同知一員帶管華亭鄉兵水兵自豐涇以至閔行皆其信地耳設巡捕同知一員住劄上海專管該鄉兵水兵自閔行以至嘉定界首皆其信地無事率兵操演有事統兵防守此松江內地設備之大略也然倭船之來乘風渡海勢難聯絡每至海外大山必停泊候齊然後深入照得洋山爲本府所屬爲定海吳淞江二總兵兵船會哨之處以地里適均



也故本府所造之船數本不多僅可以支把港之用此但可以言守而不可以言戰須得福船蒼山船各數十隻沙耆民船二三百隻每至風汛時月分泊港口各住信地更番出至洋山往來遊擊晝夜不絕外則爲定海吳淞江會哨兵船之羽翼內則爲海港把守兵船之捍衛遇有海賊齊力奮擊賊船餘散而少我船餘合而衆盛衰之氣勢既分則勝負之分數自判得海防之上策矣又查得沿海民壯原有採捕魚蝦小船並不過海通番且人船慣習不畏風濤合行示諭沿海有船之家赴府報名給與照身牌面無事聽其在海生理遇警隨同兵船追勦此則官兵無造船募兵之費而民壯有得魚捕盜之益此松江海洋設備之大略也

溫景葵曰蘇州沿海一帶險隘甚多舉其大者則常熟有福山港白茆塘太倉有劉家河七丫港嘉定有吳淞江黃壘港皆賊之通衢而東吳之門戶此則所謂一府之險要長洲則御湖浩蕩吳江則鷺湖相屬吳縣則太湖交通皆賊之徑道而腹裏之關隘此則所謂一縣之險要其

次則福山以西有三丈浦斜橋以東有許浦金涇劉家河以北有新塘浪港茜涇吳淞江以南有寶山以東有老鸛嘴均之所謂險要而少次焉者况海濱數百里一望平坦非有山嵐險阻爲之扼塞皆可以泊船登岸要害無邊兵力有限而防禦之計當先其大者以海邊惟福山爲最以腹裏惟勝墩爲最故劉家河吳淞江福山港舟師防守不可單弱白茆口七丫港黃窰港俱當預設戰艦庶與各港相爲犄角又如賊自東南而來必由寶山吳淞江宜發船一鯨泊于吳家沙以堵截之賊自東北而來必由三沙劉家河宜發船一鯨泊于營前沙以堵截之把總遊兵船隻往來策應而三丈浦新塘老鸛嘴等處亦得以聯絡而并制則蘇之外防或可無憂矣至于風汛時月吳淞水兵統發勝墩平望以防嘉興突犯之寇吳縣水兵統發太湖以防蠡里突犯之寇長洲團結水兵統發周莊以防泖湖突犯之寇本府相度緩急發遣水陸之兵以爲應援則蘇之內防或可無憂矣然福山港劉家河吳淞江各該把總之官統領兵船在洋堵截似爲有備但賊船之來聯鯨接艦乘風駕潮

萬一不能盡行邀擊或有一二泊淺登岸則水兵束手旁觀任其焚劫無可奈何而把總官亦且以爲非所事事矣合于常熟縣分撥勇兵一千名屯駐福山港五百名屯駐白茆塘太倉州分撥勇兵一千名屯駐劉家河太鎮二衛原練杆子軍兵五百名屯駐七丫港嘉定縣分撥勇兵一千名屯駐吳淞江五百名屯駐黃窩俱聽各該把總選官分領相機調度賊在外洋則水兵擊之賊若登岸則陸兵堵之彼此夾攻遠邇互應各該州縣量爲聲援如此則賊亦疑畏而不敢犯矣至于腹裏如崑山縣分撥兵夫三百名屯駐清洋江三百名屯駐千墩吳江縣分撥兵夫五百名屯駐勝墩各張聲勢以助軍威各該領兵官聽其調遣不許退避萬一賊勢重大未易爲功則各枝之兵又宜聽府州縣掌印官調回守城庶事體專一可以責成則兵勢聯絡庶不致孤懸矣

監生金魚曰倭寇之患起于吳浙而沿海及淮揚蓋揚州富甲天下人所素聞三十五年之夏賊以二百餘人突至揚州城下城中謹閉自守其任遊逸無如之何大掠而去自是益生歌艷而揚州爲賊所必窺之

地矣以江北之大勢言之東起蓼角嘴大河口以及呂四盧家等場沿于楊樹港海門裏河通州與如皋泰州稍折而北則爲揚州矣過揚州而西稍北則天長睢州抵中都踰海門而北則爲徐步營又北則爲掘港又東北則爲新插港轉而西北則金沙鹽城廟灣劉莊姚家蕩再西北則蛤蜊麻線等港而至大海口矣劉莊東北則安東安東之北則爲海洲贛榆泰州西北則爲高郵寶應寶應之北則爲淮安淮安轉西則泗州以達鳳陽此江北形勢之大略也賊入海之道有二其一新港爲一道新港卽所謂三江口蓋由南江狼山越儀真瓜州而入登岸則卞家墳周家墳稍折而東則揚州矣此可入以登岸亦可從以出海者也此最爲便道其二則蛤蜊麻線等港沿北大海口爲一道大海口有水陸路南通廟灣與劉莊姚家蕩俱爲大鎮賊若據此我兵屯于蕩潮岸等處賊南尋新港路出不得則必北尋大海口而出勢所必然也若安東海州之東北有大北海不惟道里迂遠且砂磧甚多此不可運舟者也掘港新插港之東亦有北海砂磧亦多不堪重載此但可從以入而

不可出者也是賊出海之路止有二途若其登岸之處則不一東則蓼角嘴呂四場西則楊樹港徐沙營又西則狼山楊樹港北則新插港掘港皆其所從以登岸而入寇之路也夫賊所歆慕惟在揚州一執居民便問其道若登狼山必窺通州而揚州在西使于榆東榆西等處率民以擊其後則賊必不敢直前以寇揚州若于蓼角嘴呂四場或新插港掘港以進使于榆東榆西等處屯兵以遏之則揚州可無危故今榆東榆西等處最爲要地而當事者欲屯宿重兵以控扼賊鋒者有以也按江北之地細港委蕩固亦有之而平原浩壤則視吳淞爲多夫西北騎兵倭寇未易以櫻其鋒也旣得平地則騎兵可施三十八年之捷以西北騎兵三千爲之先衝可見也他有湯潮岸者又范公所築以捍海盜者也故亦名范公堤東南起呂四場西北抵姚家場綿亘幾三四百里高圍平行可以騎兵爲之長驅今東關瓜州俱已建堡賊若于蓼角嘴呂四場及新插港掘港以進或不能襲取揚州必轉之東北而窺淮安安東以據劉莊廟灣我軍苟能彼此夾攻逼之使至湯潮岸以西北騎

兵衝其鋒而以火器繼之各路兵隨後擊之賊可一戰成擒矣故我軍  
惟利賊之至此者有以也新插港東臨北海素有鹽徒數百艘聚泊崇  
明北海之寇欲劫鹽協徒而不果當事者欲置官于此以提督鹽徒使  
不爲賊用而爲我用亦一見也夫寇興以來燒劫屠戮之慘吳浙淮揚  
所同若獲利之多則未有如淮揚者而賊所必不能舍者在是矣况其  
地運道陵寢在焉所係尤重乎夫江北之地除安豐等三十六場俱在  
海內不爲要害其要害之處乃通州也狼山也揚樹港裏河鎮也榆東  
榆西等場也蓼角嘴呂四場也楊港新插港也廟灣劉莊金沙場姚家  
蕩也今皆已建城堡設戍守非若往日之無備矣其要害之尤者曰新  
河出入最便逼近揚州也曰北海所從以通新插港且有鹽徒聚艘于  
此者也曰廟灣以其爲巨鎮而可通大海口也故當事者欲以把總三  
人一住新港一住北海一住廟灣一爲陸路遊擊住劄海安鎮蓋海安  
在如臯泰州之間東可以控扼狼山通州海門之入而西可以捍衛揚  
州也